

Mak

Mak beleŋ Mere iŋiŋ Yesu niŋ yitiŋ kayyiŋ

Yon Baptais beleŋ gitik iriyiŋ

1 ¹Baraŋ iŋiŋ gabe Yesu Kristu, Al Kuruŋ Urmiŋ gote baraŋ fudinde goyen miŋ ureŋ tihim.

²Be, Al Kuruŋ beleŋ Urmiŋ mere iriyiŋ goyen mere basaŋ almiŋ porofet kura Aisaia beleŋ asaŋde gahade kayyiŋ:

“Metey alne teŋ kermeke meheŋ heŋ kuyey.

Kuŋbe beleŋge kerde gunyey.”^a

Malakai 3:1

³“Sawsawa po kuruŋ naŋa bana goŋ al kura forok yeŋbe alya bereya beleŋ Doyaŋ Al Kuruŋyen mere nurde gama ird ird niŋ dufay gitik teŋ teŋ ge gahade kuware tagalde hiyeŋ:

‘Doyaŋ Al Kuruŋyen beleŋ kernaŋ.

Beleŋmiŋ sope irde huwa irnaŋ,’ yiriŋ,” yitiŋ hi.

Aisaia 40:3

⁴Niŋgeb Yon Baptaisbe sawsawa po kuruŋ naŋa bana forok yeŋbe alya bereya baptais yirde saba tagalde hinhin. Sabamiŋbe gahade: “Mata buluŋtiŋ yubul teŋ Al Kuruŋ niŋ bitiŋ mulgaŋ henaŋ. Irkeb Al Kuruŋ beleŋ mata buluŋtiŋ halde dunke baptais tenayiŋ,” yineŋ hinhin. ⁵Irkeb alya bereya Yudia naŋa goyen bana niŋ taun kuruŋ Yerusalemya naŋa bana goŋ niŋ taun hoyanya hoyanya goyen budam wor po Yon hitte kuŋ hinhan. Kuŋbe mata buluŋmiŋ ge Al Kuruŋ pohogay irkeb Yon beleŋ Yodan fete baptais yirde hinhin.

⁶Yonbe dapŋa kamel wuyŋey beleŋ uliŋhor irtiŋ goyen hor irdeb dapŋa sikkeŋ gore po teŋ kaŋmiŋ irde uliŋhor kerkek goyen mal temdere giti

^a **1:2** Mere gabe Aisaia beleŋ ma kayyiŋ. Malakai beleŋ kayyiŋ. Gega Aisaia Al Kuruŋyen mere basaŋ mar kuruŋ bana goŋ niŋ al denem keŋkelakbe gogo geb, Mak beleŋ Aisaia denem kayyiŋ.

irde hiyen. Irdeb bingge igiñ kura ma nene hiyen. Gusuya yalanggu fimiñya nene hiyen. ⁷Yenbe mere gahade tagalde hinhin: “Ne harhoknerbe al kura wayyen. Yende sañjibe kurun wor po, nere folek. Niñgeb ne gahade gare epte ma yen ge ten meten kurun titek hime. Kahan basanjimnde niñ kan urgun kan yugu ten ten gobe meten kurun mon gega, go wor ne beleñ epte mon yen nurde hime. ⁸Nebe fe uliñ po baptais dirde hime goyenpoga yenbe Holi Spirit beleñ baptais diryen,” yinen hinhin.

Yesu baptais tekeb Satan beleñ tuñan uryin

(Mat 3:13–4:11; Luk 3:21-22; 4:1-13)

⁹Be, go kamereb Yesu beleñ Galili bana go niñ taun dirnen Nasaret tubul ten Yon hitte Yodan fe siñare wayyin. Irkeb Yon beleñ tukun fe alare baptais iryin. ¹⁰Be, Yesu gob baptais tenbe fe ala tubul ten siñare wakeb goya goyen po nanñin hol yirin. Irkeb Yesu beleñ keneñ hikeya Holi Spirit beleñ yen hitte kalyinñi foy ten kattin yara ten katen kipiriyin. ¹¹Irde nanñin hol yitin bana gore al melak kura forok yen Yesu mere iryin: “Gebe urne, bubulkunne wor po. Ge niñ amanen wor po nurde gunen hime,” inyin.

¹²Be, go kamereb Holi Spirit beleñ Yesu goyen sawsawa po kurun naña bana gon bul irde tukurin. ¹³Tukukeb wawun 40 gon hinhin. Irkeb ungunrayen kurunmin Satan beleñ Yesu mata bulun tiyi yen tuñan urde hinhin. Dapña duwi fuleñam yan kahal bana hikeya Al Kurunyen miyon beleñ doyan irde faran urde hinhan.

Yesu beleñ komatmin yawaryin

(Mat 4:12-22; Luk 4:14-15; 5:1-11)

¹⁴Be, Galili nanare niñ doyan al kurun Herot Antipas beleñ Yon ten koyare kiryin. Go kamereb Yesu go Galili nanare kunbe Al Kurunyen mere igin goyen tagalde hinhin. ¹⁵Mere tagalde hinhinbe gahade: “Al Kurun beleñ alya bereyamun doyan yiren yen bikken nalu kiryin gobe gago binde hihi. Niñgeb yen yufuk bana hitek yen nurde han kenem mata buluntin yubul ten Al Kurun niñ bitin mulgan henbe meremin ge dufaytin sañin irnayin,” yinyin.

¹⁶Be, Yesu go Galili Makaan feren kun henyaabe Saimonya kulin Andruya makañde kaman temeyde hike yinyin. Ire itinnya gobe makañ dapña yad yad mar. ¹⁷Be, Yesu beleñ irem go yenenbe, “Wayyi. Wan ne gama niryi. Irkeb al yade Al Kurun hitte yukun yukun mar diren,” yinyin. ¹⁸Irkeb goyare po kamanmin yubul ten Yesu gama iraryum.

¹⁹Be, mun kura kutnen tenbe Yemsya kulin Yonyabe naniñ Sebediya meten marminya hakwamin hende hen kaman sope irde hike yinyin. ²⁰Yenenbe ire itinnya goyen wor hoy yiryin. Irkeb irem go naniñya meten marminya hakwa bana po yubul tenbe Yesu gama iraryum.

Yesu beleŋ uŋgura takira tiyyiŋ

(Luk 4:31-37)

²¹Be, Yesuya komatmiŋ meheŋde yawaryiŋ goya irde Kapeneam taunde kwamiŋ. Kuŋbe Yuda marte usaŋ nalu Sabat hekeb Yesu beleŋ Yuda marte gabu ya bana hurkuŋbe gabu ya bana goŋ hinhan mar goyen saba yiryiŋ. ²²Irkeb sabamiŋ go nurdeb saba gobe Moseyen saba tagalde haŋ mar beleŋ tagalde haŋyen yara moŋ, irde Al Kurunyen saŋiŋ miŋyaŋ beleŋ saba titiŋ yara saba tike keneŋbe dinoŋ kok yamiŋ. ²³Be, goyare goyenbe uŋgura ketal urtiŋ al kura gabu ya bana goŋ hinhin gore kekew tiyyiŋ. ²⁴Kekew teŋbe gaha inyiŋ: “Yesu, Nasaret niŋ al! Gebe daha dire yeŋ wayha? Gwamuŋ dure yeŋ wayha? Neb nurde gunen hime. Gebe Al Kurunyen Urmiŋ wor po,” inyiŋ. ²⁵Irkeb Yesu beleŋ mere hitemde po, “Bada hawa, irde al go tubul teŋ kat kwa!” inyiŋ. ²⁶Irkeb uŋgura gore al goyen uguŋ po aŋgor aŋgor irde kekew teŋbe tubul teŋ kat kuriŋ.

²⁷Be, al gor hinhan mar gore keneŋbe hurkuŋkat wor po teŋbe tigiri teŋ kadom gusuŋaŋ gird tiyamiŋ. “Ey, gab dahadebe gago? Saba gabe tiŋen wor po, Al Kurunyen saŋiŋ miŋyaŋ. Niŋgeb uŋgura wor meremiŋ nurdeb al go tubul teŋ busahaŋhaŋ!” yamiŋ. ²⁸Irkeb Yesuyen mere momoŋ gobe Galili naŋa bana goŋ bemel po kuruŋ heŋ kuriŋ.

Yesu beleŋ al budam guram yirde hinhin

(Mat 8:14-17; Luk 4:38-41)

²⁹Be, Yemsya Yonya irde Yesuya komatmiŋ hoyan kura goya gobe gabu ya go tubul teŋbe goyare po Saimonya Andruiyat yare kwamiŋ. ³⁰Yare gorbe Saimon teŋakbe aygaŋ buluŋ po irke ferde hinhin. Irkeb goke Yesu momoŋ iramiŋ. ³¹Irkeb kuŋ keneŋbe haniŋde tanarde faraŋ urde isaŋ hekeb aygaŋ gob tubul tiyyiŋ. Irkeb bere go huwardebe Yesuya komatmiŋya goyen biŋge kaŋ yunyiŋ.

³²Be, Yesuyen mere momoŋ nuramiŋ mar beleŋbe goyen wawuŋbanare goyen ŋumtuk urde hikeb Sabat nalu hubu hihi yeŋbe Yesu hitte garbam marya uŋgura beleŋ ketal yurtiŋ marya kuruŋ goyen yade wayamiŋ. ³³Be, Kapeneam taunde niŋ al buda kuruŋ goyen waŋ Yesu hinhin ya goyen diliŋ mar gabu iramiŋ. ³⁴Irkeb Yesu beleŋ garbamiŋ kurayen kurayen goyen sope yiryiŋ. Irdeb uŋgura beleŋ al ketal yurtiŋ goyen wor yakira tiyyiŋ. Goyenbe uŋgura gore Yesube al gwahade yeŋ nuramiŋ. Gega, “Ne niŋ ma tagalnayiŋ,” yinenŋ utaŋ yiryiŋ.

Yesube Galili naŋa bana saba tagalde hinhin

(Luk 4:42-44)

³⁵Be, naŋa hako ga fay urde hikeyabe Yesu huwarde ya go tubul teŋ naŋa al miŋmoŋde kuriŋ. Kuŋbe Al Kurunya mere teŋ hinaryum. ³⁶Irkeb

Saimonya kadam yagoya beleŋ kuŋ yeŋ ge naŋkenenŋ hinhan. ³⁷Irde kenenŋbe, “Al buda kuruŋ gayen ge niŋ naŋkenenŋ haŋ,” inamiŋ. ³⁸Irkeb Yesu beleŋ wol heŋbe, “Nebe saba tagal tagal niŋ wamiriŋ. Niŋgeb wake tiyuŋ biŋyaŋ biŋyaŋ ga wor kuniŋ. Kuŋ goyaŋ wor saba tagalde tukenŋ,” yinyiŋ. ³⁹Gwaha yeŋbe Galili naŋa bana kuŋ Yuda marte gabu yayaŋ saba tagalde uŋgura yakira teŋ hinhin.

Yesu beleŋ al kura busuka miŋyaŋ sope iryiŋ

(Mat 8:1-4; Luk 5:12-16)

⁴⁰Be, al kura busuka miŋyaŋ beleŋ Yesu hitte waŋ kahaŋ miŋde kuku kaŋbe eseŋ mere irde, “Dufayger wilakneŋ nurde ha kenem igiŋ sope nirayiŋ,” inyiŋ. ⁴¹Gwaha inkeb Yesu beleŋ bunineŋ wor po nurdeb haniŋ temeyde al go tanaryiŋ. Irdeb, “Igiŋ sope gireŋ geb, igiŋ hawa!” inyiŋ. ⁴²Irkeb goyare po usu buluŋ go hubu hekeb igiŋ hiriŋ. ⁴³⁻⁴⁴Irkeb Yesu beleŋ, “Al hoyaŋ kura mata gake momoŋ ma yirayiŋ,” ineŋ hayhay irdeb, “Al Kuruŋ doloŋ ird ird mata doyaŋ mar hitte po kuŋ ulge yikala yirayiŋ. Irkeb ulge go keneŋ fudinde igiŋ hihi yekeb Mose beleŋ bikkeŋ yiriŋ mata goyen gama irde dapŋa kura teŋ mel go yunkeb ge niŋ teŋ Al Kuruŋ kunga teŋ unnayiŋ. Irkeb al tumŋaŋ fudinde igiŋ haha yeŋ gennayiŋ,” ineŋbe, “Igiŋge kwa!” inyiŋ. ⁴⁵Goyenpoga al go siŋare kuŋbe igiŋ hiriŋ goke mali po tagalde tukuriŋ. Irkeb mere go kuŋ kuruŋ hiriŋ. Goke teŋbe Yesu goyen taunyaŋ kawan heŋ kutek ma irkeb al miŋmoŋ naŋayaŋ po heŋ kuŋ hinhin. Goyenbe albe tiyuŋ kurhan mat kurhan mat kinniŋ yeŋ waŋ hinhan.

Yesu beleŋ al uliŋ kamtiŋ sope iryiŋ

(Mat 9:1-8; Luk 5:17-26)

2 ¹Be, wawuŋ karwo ma sipte wet kura heŋbe Yesu go tebaŋ Kapeneam kuriŋ. Kuŋ yare hikeb albe nuramiŋ. ²Nurdeb kinniŋ yeŋ al budam waŋ yare gor gabu iramiŋ. Irkeb Yesu beleŋ saba tagalde hinhin. Ya biŋ bana goŋbe gasuŋ makiŋ wor po hiriŋ. Ya siŋare wor gwahade po. ³Gwaha teŋ hikeb al sipte kura gore al uliŋ kamtiŋ sapirte teŋ wayamiŋ. ⁴Gega beleŋ gwaha mat kura Yesu hitte tukutek moŋ yirkeb teŋ ya goyen hende hurkamiŋ. Hurkuŋbe Yesu hinhin turte gor yameŋ iramiŋ. Irdeb garbam al go sapirte palgir irke Yesu hinhin binde kurkuriŋ. ⁵Irkeb Yesu beleŋ dufaymiŋ tareŋ go yeneŋbe al uliŋ kamtiŋ goyen, “Urne, mata buluŋge halde gunhem,” inyiŋ.

⁶Goyenterbe Moseyen saba mar kura gor keperdeb biŋde po, ⁷“Al gabe al dahade niŋgeb mere gwahade tiya? Al Kuruŋ po gab alyen mata buluŋ halde hiyen. Yeŋbe Al Kuruŋ suk al irde hi,” yeŋ dufay heŋ hinhan. ⁸Gwaha teŋ hikeb Yesu beleŋ yeneŋ bebak teŋbe gaha yinyiŋ: “Daniŋ dufay gwahade kerde haŋ? ⁹Damiŋbe meteneŋ? ‘Mata buluŋge

halde gunhem,' inhem goyen ma 'Huwarde sapirge tej kwa,' iney goyen?¹⁰ Gogab deŋ beleŋ, 'Nebe Al Urmiŋ,^b megen niŋ marte mata buluŋ halde halde saŋiŋ miŋyaŋ,' yeŋ nennayiŋ," yinyiŋ. Gwaha yineŋbe garbam al goyen,¹¹ "Ne gare ginhem. Huwarde sapirge tej yager kwa!" inyiŋ.¹² Inkeb al tumŋaŋ keneŋ hikeya huwardeb sapirmiŋ tej siŋare kat kuriŋ. Irkeb al tumŋaŋ gor hinhan goreb hurkuŋkat teŋbe, "Ey, mata gahade kura ma keneŋ hityen. Da matabe gago?" yeŋbe Al Kuruŋ turuŋ iramiŋ.

Yesu beleŋ Liwai hoy iryiŋ
(*Mat 9:9-13; Luk 5:27-32*)

¹³Be, Yesu go tebaŋ Galili fe ala kuruŋ fereŋyaŋ kuŋ hikeb al budam yeŋ hitte wayamiŋ. Irkeb saba yirde hinhin. ¹⁴Kuŋ heŋyabe Alfius urmiŋ Liwai teks yad yad gasuŋde^c keperde metey tej hike kinyiŋ. Keneŋbe, "Gama nira," inkeb Liwai go huwarde gama iryiŋ.

¹⁵Be, Yesu go komatmiŋya Liwaiyen yare kuŋbe Liwaiyen metey kadom yagoya Moseyen saba keŋkela ma gama irkeb Yuda marte tikula saŋiŋ po gama irde haŋyen Farisi mar beleŋ "mata buluŋ mar" yineŋ haŋyen mar goya dula tej hinhan. Al budam yeŋya hinhan. ¹⁶Gwaha tej hikeb Farisi mar kura Moseyen saba tagalde haŋyen mar beleŋ yeneŋbe Yesuyen komatmiŋ goyen yinamiŋ: "Dahade niŋgeb yeŋbe teks yad yad marya 'mata buluŋ mar' yineŋ hityen mar goya dula tej haŋ?" ¹⁷Gwaha yinke nurdeb Yesu beleŋ wol heŋbe, "Al uliŋde igiŋbe guram al niŋ ma nurde haŋyen. Garbam al po gab guram al niŋ nurde haŋyen. Nebe neŋ al huwak yeŋ nurde haŋ mar goyen faraŋ yure yeŋ ma wamiriŋ. Gwaha titŋeŋbe neŋbe mata buluŋ mar yeŋ nurde haŋ mar faraŋ yure yeŋ wamiriŋ," yinyiŋ.

Farisi mar beleŋ biŋge kutŋa ird ird mata niŋ Yesu gusuŋaŋ iramiŋ
(*Mat 9:14-17; Luk 5:33-39*)

¹⁸Be, Yon Baptaisyen komatya Farisi maryabe biŋge kutŋa irde hinhan. Irkeb al kura Yesu hitte waŋbe, "Yonyen komatya Farisi marte komatyabe biŋge kutŋa irde haŋ gega, daniŋ geb komatgebe gwaha ma tej haŋ?" iney gusuŋaŋ iramiŋ. ¹⁹Irkeb Yesu beleŋ wol heŋbe gaha yinyiŋ: "Dahade niŋgeb tikiŋ mere miŋ al yiŋgeŋ hikeya biŋge netek marbe biŋge kutŋa irnayiŋ? Gobe epte moŋ. ²⁰Gega kame kura tikiŋ mere miŋ al go yubul tej kuke gab igiŋ biŋge kutŋa irde hinayiŋ.

²¹"Al kura amil gergeŋ tej amil bikkekya ma gada iryeŋ. Gwaha iryeŋ gobe amil gergeŋ gote kaŋ beleŋ amil bikkek yuluŋ tikeb yameŋ

^b 2:10 Al Urmiŋ gote miŋbe alya bereya Al Kuruŋ hitte Yumulgaŋ tej tej Al. Daniel 7:13 gorbe deŋem Al Urmiŋ goyen hi. ^c 2:14 Roma gabmanyen teks hora tej tej gasuŋ. Roma gabmande hora tej tej goke Yuda mar beleŋ igiŋ ma nurde hinhan.

go kuruŋ wor po hiyyeŋ. ²²Al kura wain fimiŋ gergeŋ teŋ dapŋa sikkeŋ beleŋ po wain fimiŋ heŋ heŋ irtiŋ bikkek bana goŋ ma unyeŋ. Gwaha iryeŋbe wain fimiŋ gergeŋ goreb wain fimiŋ heŋ heŋ bikkek goyen kunga tike erek nene wok yeŋ pasi hekeb det irawakde tumŋaŋ buluŋ hiriryenŋ. Niŋgeb wain fimiŋ gergeŋbe wain fimiŋ heŋ heŋ gergeŋ bana po untek,” yinyiŋ.

Yesube Sabat nalu gote miŋ al

(Mat 12:1-8; Luk 6:1-5)

²³Be, Sabat nalu kurare kurab Yesuya komatmiŋya wit^d metenyaŋ kuŋ hinhan. Kuŋ heŋbe komatmiŋ beleŋ wit igineŋ yad namiŋ. ²⁴Go nene hikeya Farisi mar beleŋ waŋ yeneŋbe Yesu goyen, “Sabat nalure mata gwaha ma teŋ hinayiŋ yitiŋ goyen komatge yago beleŋ mata teŋ haŋ gabe dahade?” inamiŋ. ²⁵Irkeb Yesu beleŋ wol heŋbe gaha yinyiŋ: “Dewitya kadomya biŋge kamde mata tiyamiŋ gobe ma kapyaŋ heŋ nurde haŋyen? ²⁶Abiatar beleŋ Al Kuruŋ doloŋ ird ird mata doyaŋ mar gote kuruŋmiŋ hinhinyabe Dewit beleŋ Al Kuruŋyen ya balem bana hurkuŋ biŋge himam Al Kuruŋ doloŋ ird ird mata doyaŋ marte kudineŋ goyen yade kadomya namiŋ. ²⁷Niŋgeb Al Kuruŋ beleŋ albe Sabat nalu niŋ ma iryiŋ. Sabat nalube al niŋ iryiŋ. ²⁸Niŋgeb Sabat nalu goyen wor ne Al Urmiŋ gabe gote miŋ al,” yinyiŋ.

Al haniŋ nonbo hitiŋ sope iryiŋ

(Mat 12:9-14; Luk 6:6-11)

3 ¹Be, wawuŋ kurare kurab Yesu go Yuda marte gabu yare hurkuriŋ. Bana goŋbe haniŋ nonbo hitiŋ al kura hinhin. ²Ya bana goŋ hinhan mar goyen kurabe Yesu beleŋ Sabat nalure sope irke goyenter merem yaŋ irniŋ yeŋ kintiŋde kintiŋde hinhan. ³Irkeb Yesu beleŋ al haniŋ nonbo hitiŋ goyen, “Kuŋ al diliŋ mar huwara,” inyiŋ. ⁴Irdeb gor hinhan mar goyen, “Sabat nalure mata dahadebe igiŋ? Mata buluŋ ma mata igiŋ? Niŋgeb al sope yirtek ma yubul titeke kamnayaŋ?” yineŋ gusuŋaŋ yiryiŋ. Gwaha yinkeb mel gobe merem moŋ, doŋ uramiŋ. ⁵Irkeb Yesu beleŋ tonaŋ tareŋ mar goyen yeneŋ tukuŋbe biŋ ar yiriŋ gega, bunineŋ nurde yunyŋ. Irdeb al go, “Hange giŋ ira,” inkeb haniŋ giŋ iryiŋ. Irkeb goya goyen po igiŋ hiriŋ. ⁶Gwaha tike keneŋbe Farisi mar gobe kat kuŋ Herotyen marya gabu heŋ daha mat kura Yesu mayteke kami yeŋ mere sege iramiŋ.

Al budam Yesu gama irde hinhan

⁷Be, Yesuya komatmiŋya gobe gor mat Galili fe ala kuruŋ siŋare kurkamiŋ. Kurkukeb Galili naŋa bana goŋ niŋ al budam gama iramiŋ.

^d 2:23 Witbe rais yara. Gore beret irde haŋyen.

⁸Yesu mata teŋ hinhin gote mere momoŋ nurdeb al budam Yerusalem, Saidonyabe, Tair taunde niŋya Yudiaya Idumea naŋa bana goŋ niŋ alya Yodan fe siŋa kurhan kurhan mat waŋ Yesu hitte gabu iramiŋ. ⁹⁻¹⁰Yeŋ beleŋbe al budam sope yiryiŋ. Irkeb garbam mar kura gor hinhan goreb Yesu sisaŋ urniŋ yeŋ kadom weŋ yupepel yirde kwamiŋ. Al budam gwaha tikeb Yesu beleŋ komatmiŋ yago goyen, “Hakwa kura tawaŋ nunnaj. Gogab al farkaka ma nirnayaŋ ge,” yinyiŋ. ¹¹Be, uŋgura al ketal yurtiŋ hinhan goreb Yesu keneŋ kafura heŋbe, “Gebe Al Kurun Urmiŋ wor po!” inen megen kateŋ kekew teŋ hinhan. ¹²Gega Yesu beleŋ, “Al hoyaj goya momoŋ yirde ma!” yineŋ saŋiŋ po hayhay yirde hinhin.

Yesu beleŋ komatmiŋ 12 yawaryiŋ

(Mat 10:1-4; Luk 6:12-16)

¹³Be, Yesu go naŋa doŋdoŋeŋde kura gor hurkuŋ al goyen yaware yeŋ nurde yuneŋ hinhin mar go po deŋe yurke yeŋ hitte hurkamiŋ. Yeŋ hitte kukeb al 12 yawaryiŋ. ¹⁴⁻¹⁵Irdeb al 12 gokeb, “Yeŋbe neya hitek. Irde hulyaŋ yirmeke kuŋ saba tagalde tukun hinayiŋ. Tareŋ yunmeke uŋgura yakira teŋ hinayiŋ,” yeŋ mel goyen “Komatne yago” yinyiŋ. ¹⁶Al 12 yawaryiŋ gote deŋembe Saimon, deŋe gergeŋ unyiŋbe Pita, ¹⁷Sebedi urmiŋ waraŋ Yemsya kuliŋ Yon deŋem gergeŋbe Boaneges. Deŋe gote miŋbe mohon ukam yaŋ daga kuliŋ yara. ¹⁸⁻¹⁹Kurabe Andru, Filip, Batolomiyu, Matiyu, Tomas, Yems yeŋbe Alfius urmiŋ, Tadius, Saimon yeŋbe Selot,^e irde Yudas Iskariot. Yudas Iskariot gobe kame Yesu niŋ asogo hay hiriŋ al go goyen.

Yesuya Uŋgura Belsebulya

(Mat 12:22-32; Luk 11:14-23; 12:10)

²⁰Be, Yesuya komatmiŋya gobe yare hurkuŋbe, “Biŋge niniŋ,” yamiŋ. Gega al budam heŋ ga moŋ sopte waŋ gabu irkeb epte ma dula titek hamiŋ. ²¹Goyenterbe Yesu tayneŋ goyen, “Yesube kukuwa heŋ hi,” mere momoŋ nuramiŋ. Irdeb Yesube ya goyenter hi yeŋ nurdeb tiyuŋmiŋde teŋ kuniŋ yeŋ wayamiŋ. ²²Gwaha teŋ hikeyabe Moseyen saba mar kura Yerusalem mat kateŋ Yesu niŋ yeŋbe, “Al gabe uŋgurayen kurunmiŋ Belsebul beleŋ ketal urtiŋ geb, Belsebul gote tareŋde uŋgura yakira teŋ hi,” yamiŋ. ²³Gwaha yeke nurdeb Yesu beleŋ wanaŋ yinke waŋ gabu irkeb siraw merere gaha yinyiŋ: “Dahade niŋgeb Satan beleŋ uŋgura kadom yakira tiyyen? ²⁴Al miŋ kurun kura beleŋ yiŋgeŋ uliŋ kadom asogo gird teŋ bur yenayiŋ gobe tareŋ ma heŋ tumŋaŋ buluŋ henayiŋ. ²⁵Irde al miŋ unkuŋeŋ wor gwahade po yiŋgeŋ uliŋ kadom asogo gird teŋ bur yenayiŋbe tumŋaŋ mugol nenayiŋ. ²⁶Niŋgeb gwahade goyen

^e 3:18-19 Roma gabman asogo irde hinhan mar gote deŋembe Selot.

po Satan belej unguṛa yeŋ yufukde haŋ goyen buluŋ buluŋ yiryenbe dahadem saŋiŋ henayiŋ? Epte moŋ. Gwaha tinayiŋbe tareŋmiŋ hubu hiyyeŋ.

²⁷“Al kura epte ma al tareŋ miŋyaŋde yare hurkuŋ detmiŋ yawaryeŋ. Gwaha tiye yeŋbe al saŋiŋ miŋyaŋ go wa teŋ fere tike hike gab epte detmiŋ yawaryeŋ. ²⁸Fudinde wor po dineŋ hime. Mata buluŋya sukal meretiŋyabe Al Kuruŋ belej igiŋ halde dunyeŋ. ²⁹Gega Holi Spirit sukal irnayiŋbe epte ma wor po halde dunyeŋ. Mata buluŋtiŋ gobe hugiŋeŋ hiyeŋ,” yinyiŋ. ³⁰Yesu belej gwaha yinyiŋ gobe Farisi mar gore yeŋ ge yeŋ, “Yeŋbe unguṛam yaŋ,” yekeb gogo gwaha yinyiŋ.

Yesu miliŋya kuliŋ weŋya
(*Mat 12:46-50; Luk 8:19-21*)

³¹Be, Yesu go gwaha teŋ gor hikeb miliŋya kuliŋ weŋya waŋ forok yeŋbe Yesu hinhin ya goyen siŋare heŋbe yeŋ ge keya hamiŋ. ³²Irkeb Yesu hitte waŋ milgu irde keperde hinhan mar belej nurdeb, “Momkeya kolge yagoya waŋ siŋare ga heŋ ge niŋ yeŋ haŋ,” inamiŋ. ³³Gwaha inkeb, “Ganuŋbe mamneya kolne weŋya?” yineŋ gusuŋaŋ yiryiŋ. ³⁴Irdeb alya bereya keperde milgu iramiŋ mar goyen yeneŋbe, “Mamneya kolne weŋyabe gago haŋ! ³⁵Alya bereya Al Kuruŋyen dufay gama irde haŋ marbe kolne, hayneya mamne yagoya,” yinyiŋ.

Yasuŋ alyen maya mere
(*Mat 13:1-9; Luk 8:4-8*)

4 ¹Be, Yesube Galili fe ala kuruŋ siŋare kura gor tebaŋ sabamiŋ miŋ uryiŋ. Gorbe al budam wor po gabu iramiŋ. Niŋgeb Yesu go hakwa dirŋeŋ kura goyen hende hurkuŋ keperde saba yirde hike albe fe siŋare heŋ sabamiŋ palŋa irde hinhan. ²Sabamiŋ budambe maya mere mat yirde hinhin. Maya meremiŋ kurabe gahade: ³“Ga nurnaŋ! Al kura wit muykeŋ tur ire yeŋ metenmiŋde kuriŋ. ⁴Kuŋbe wit muykeŋ tur irde tukuriŋ. Goyenbe kura soŋ heŋbe beleyaŋ katamiŋ. Katkeb nu belej namiŋ. ⁵Kurabe hora arat geb, megeŋ halgayiŋ bana katamiŋ. Irdeb araŋ po kawaŋ hamiŋ. ⁶Goyenbe filiniŋ tareŋ ma hitiŋ geb, naŋa belej kunga yirke algup nen kamamiŋ. ⁷Wit muykeŋ kurabe soŋ heŋ yamuŋ duwi bana katamiŋ. Irde igiŋ kawaŋ hamiŋ gega, yamuŋ duwi belej awrum yurke nonbo heŋ igineŋ ma hamiŋ. ⁸Goyenpoga kurabe megeŋ igiŋyaŋ wor po katamiŋ. Kateŋ kawaŋ heŋ karkuwaŋ heŋbe igineŋ budam wor po forok yamiŋ. Iginen kurabe 30, kurabe 60, irdeb kurabe 100 gwahade forok yamiŋ,” yinyiŋ. ⁹Gwaha yineŋbe, “Mere teŋ hime gayen bebak tiniŋ yeŋbe keŋkela palŋa irde gab bebak tinayiŋ,” yinyiŋ.

¹⁰Be, al hoyaŋ bur yeŋ pasi hekeb komatmiŋya al kura yeŋ gama irde hinhan marbe yeŋ hitte waŋ kalyaŋ kerdeb siraw mere tiyyiŋ goke

gusuŋaŋ iramiŋ. ¹¹Irke wol heŋbe gaha yiniŋ: “Deŋbe Al Kurun beleŋ alya bereyamiŋ doyaŋ yird yird mata banare hiyen goyen gago kawan dikala dirhem. Gega ne ma neŋkela heŋ haŋ marbe siraw mere teŋ hime gate miŋ ma nurnayiŋ. ¹²Ga mata gake Al Kurunyen mere basan al Aisaia beleŋ bikkeŋ gahade kayyiŋ:

‘Yeŋbe keneŋ hinayiŋ, gega bebak ma teŋ hinayiŋ,
irde mere nurde hinayiŋ, goyenbe miŋ go ma nurde hinayiŋ.
Moŋ manhan biŋ mulgaŋ hekeb Al Kurun beleŋ mata bulunmiŋ
halde yunwoŋ,’ katiŋ hi,” yiniŋ. *Aisaia 6:9-10*

Yesu beleŋ yasun alyen maya mere gote miŋ tagalyiŋ
(Mat 13:18-23; Luk 8:11-15)

¹³Irdeb sopte gaha yiniŋ: “Yasun alyen maya mere gate miŋbe muŋ kura ma nurde haŋ? Niŋgeb daha matbe siraw mere hoyan goyen miŋ bebak tinayiŋ? ¹⁴Yasun alyen maya mere gote miŋbe gahade: yasun al beleŋ wit muykeŋ tur iryeŋ gote miŋbe al kura beleŋ Al Kurunyen mere tagalde tukuyeŋ. ¹⁵Al kurabe wit muykeŋ beleŋyaŋ kattin go gwahade goyen. Al Kurunyen mere nurkeb goyare po Satan beleŋ waŋ binde mere goyen goran yiryen. ¹⁶⁻¹⁷Munaŋ kurabe Al Kurunyen mere nurde amaŋ henayiŋ. Goyenbe mere goke teŋ kanduk forok yekeb Al Kurunyen mere goyen aran po tubul tinayiŋ mar gobe wit muykeŋ hora arat bana kattin go gwahade goyen. ¹⁸Al kurabe wit muykeŋ yamuŋ duwi dugu bana kattin yara. Yeŋbe Al Kurunyen mere nurnayiŋ. ¹⁹Gega heŋ heŋmiŋ ge ug po dufay heŋ kandukneŋ nurde, megen niŋ samunya det kurayen kurayen yad yad niŋ po biŋ harde hike gore Al Kurunyen mere biŋ bana hiyeŋ goyen hika tikeb nonbo heŋ igineŋ ma hiyyeŋ. ²⁰Munaŋ kura marbe wit muykeŋ megen igiŋyaŋ kateŋ kawan heŋbe igineŋbe budam 30, 60, kurabe 100 gwahade forok yenayiŋ go gwahade yara. Al gobe Al Kurunyen mere nurde binde kerde gama irdeb gote igineŋ budam wor po forok yiryen,” yiniŋ.

Hulsiyen maya mere
(Luk 8:16-18)

²¹Irdeb sopte gaha yiniŋ: “Al ganun kura hulsi usun urde tukun koron teŋ aw urde hiyen? Ma tukun pon bana kerde hiyen? Hubu wor po. Gwaha irtineŋbe teŋ omasin hende binun irde hiyen. ²²Niŋgeb det kura banare haŋ goyen kamebe tumnan kawan forok yenayiŋ. Irde det kura malare haŋ gobe tumnan kamebe hol yirke kawan heke yennayiŋ. ²³Mere tihim ga miŋ nurnin yeŋbe keŋkela palna irde bebak tinayiŋ,” yiniŋ.

²⁴Gwaha yineŋbe sopte gaha yiniŋ: “Mere nurhan gake keŋkela dufay henayiŋ. Mere gabe fudinde yeŋ gama irkeb go hendebe Al Kurun beleŋ

dufay igiñ budam dunyeñ. ²⁵Fudinde, al kura mere gate miñ nurde biñ hol iryeñbe Al Kurunyeñ dufay mañiñ wor po hiyyeñ. Goyenpoga mere gobe nuryeñ gega, gama irtek ma iryeñ al gobe Al Kurun beñeñ bikkeñ dufay untin go wor tumulgañ tiyyeñ,” yinyiñ.

Det muykeñ kawañ heñ heñyen siraw mere

²⁶Be, Yesu beñeñ sopte gaha yinyiñ: “Al Kurun beñeñ alya bereyamiñ doyañ yirde hiyen gote matabe gahade: al kura metenđe kuñ wit muykeñ tur iryeñ. ²⁷Irde mulgañ heñ yare wañ ferd fay hiyeñ kurun gobe wit muykeñ goyen gwaha mat kura pul yeñ kawañ heñ hi yeñ ma nurde hiyeñ. ²⁸Hiyeñ kurun gobe megeñ fimiñ teñbe kawañ heñ kurun heñ hiyeñ. Hañkapyabe pigin wa forok yiyyeñ. Irkeb gor matbe fuwala hiyyeñ. Irde go kamereb igineñ budam wor po henayiñ. ²⁹Wit sak yeñ yeñ nalu hekeb meten miñ al wañbe wit wal wal bidila tukuñ walde yawaryeñ,” yinyiñ.

Mastet he bilmiñ gote siraw mere

(Mat 13:31-32,34; Luk 13:18-19)

³⁰Be, Yesu beñeñ sopte gaha yinyiñ: “Al Kurun beñeñ alya bereyamiñ doyañ yird yird gobe dahade yeñ nurtek? Irde da siraw merere tagaltek? ³¹Al Kurun beñeñ alya bereyamiñ doyañ yird yird gobe mastet he bilmiñ dirneñ muñ wor po megen kawañ hiyyeñ go gwahade goyen. ³²Kawañ heñ kuñ kurun heñ haniñ karkuwañ hekeb nu beñeñ wañ goyañ hagam yirde hinayiñ,” yinyiñ.

³³Be, Yesube maya mere budam gahade gayen po igiñ bebak tinayiñ mat saba yirde hinhin. ³⁴Yeñbe siraw merere po saba yirde hinhin. Gega komatmiñ yagoya po heñbe siraw mere gote miñ banare niñ goyen kawan bebak yirde hinhin.

Yesu beñeñ meñeya dubaya masi yiryiñ

(Mat 8:23-27; Luk 8:22-25)

³⁵Be, goyen wawuñbanabe Yesu beñeñ komatmiñ goyen, “Fe ala siña kurhan iron kuniñ,” yinyiñ. ³⁶Gwaha yinkeb al buda kurun goyen gor po yubul teñbe Yesu hinhin hakware gor hurkuñbe kwamiñ. Irkeb al hoyañ wor hakwa kura hende hurkuñbe Yesu gama iramiñ. ³⁷Kuñ hikeb meñe tareñ po huwaryiñ. Irkeb fe goyen makañ duba yara karkuwañ huwarde wañ hakwa siñsiñyañ mayde biñ bana kurkuñ hinhin. ³⁸Goyarebe Yesu go hakwa kimyañ beñeñ kalku hende ferde hinhin. Irke komatmiñ beñeñ igiñ ma nurde isañ heñbe, “Tisa, kamniñ teñ hite gabe igiñ nurde ha?” inamiñ. ³⁹Irkeb Yesu go huwardeb meñeya dubaya goyen masi yirde, “Bada hiri!” yinkeb goya po yul yeñ kamaryum. ⁴⁰Irkeb Yesu beñeñ komatmiñ yago goyen, “Denbe sañiñne ma keneñ bebak teñ hañ geb,

gago kafura heŋ haŋ?” yiniŋ. ⁴¹Irkeb komatmiŋ yago gobe kafura wor po heŋ kadam gusuŋaŋ gird teŋbe, “Da albe gago? Meŋeya makaŋya wor meremiŋ nurhar!” yamiŋ.

Yesu beleŋ al unŋuram yaŋ sope iryiŋ

(*Mat 8:28-34; Luk 8:26-39*)

5 ¹Be, Yesuya komatmiŋya gobe Galili fe ala kuruŋ siŋa kurhan Gerasa marte naŋare forok yamiŋ. ²Irdeb Yesu gobe hakwa tubul teŋ siŋare kat kukeb al kura unŋuram yaŋ beleŋ Yesu kene yeŋ bembare mat wayyiŋ. ³Al gobe bembayaŋ ferde kuŋ hiyen. Yeŋbe al beleŋ epte ma tanarde fere titek. Kaŋ tareŋ sende wor epte ma fere titek hiyen. ⁴Tanarde kahaŋya haniŋya fere teŋ haŋyen. Gega sen kiriŋtiktuk heŋ kahaŋde niŋ ain manaŋ yukala teŋ hiyen. Niŋgeb al beleŋ epte ma hikaka irde fere titek hiyen. ⁵Yeŋbe hugiŋeŋ duguyaŋ kuŋ bembayaŋ heŋ kekew teŋ sikkeŋ hora po ilka teŋ hiyen.

⁶Be, al gore Yesu go gisaw mat po keneŋbe kup yeŋ waŋ Yesu kahaŋ miŋde kateŋ dokolhoŋ yuguluŋ tiyyiŋ. ⁷⁻⁸Irkeb Yesu beleŋ unŋura goyen, “Unŋura, gebe nurde guneŋ hime. Al ga tubul teŋ kat kwa!” inkeb unŋura gobe woywoy yeŋ kekew teŋbe, “Yesu! Gebe Al Kuruŋ tareŋmiŋ kuruŋ wor po gote Urmiŋ. Daha nireŋ teŋ ha? ‘Buluŋ ma gireŋ,’ nineŋbe masi tiyayiŋ,” yeŋ eseŋ mere iryiŋ. ⁹Irkeb Yesu beleŋ, “Deŋgebe ganuŋ?” inyiŋ. Irkeb wol heŋbe, “Neŋbe budam po hite geb, deŋnebe Legiyon,”^f inyiŋ. ¹⁰Irdeb, “Naŋa hitere gar mat hoyande ma dakira tiyayiŋ,” ineŋ eseŋ mere irde parsay iryiŋ.

¹¹Be, mel go hinhan bindere gorbe bu budam wor po dugu dabayiŋde kura gor nuku teŋ dulaŋ teŋ hinhan. ¹²Irkeb unŋura buda goreb, “Ge beleŋ ok dinkeb kuŋ bu iro ketal yurniŋ,” ineŋ Yesu eseŋ mere iramiŋ. ¹³Irkeb Yesu beleŋ wol heŋbe, “Igiŋ,” yinkeb unŋura buda goyen al go tubul teŋ kuŋ bu buda goyen ketal yuramiŋ. Irkeb bu buda 2,000 goyen tumŋaŋ hul yeŋ kuŋ hamulare mat fe ala bana kurkuŋ fe nene kamamiŋ.

¹⁴Irkeb bu doyaŋ mar beleŋ mata goyen keneŋbe busaharde tiyuŋmiŋyaŋ irde metenyaŋ kuŋbe mata forok yiriŋ goke tagalde tukamiŋ. Irkeb mere go nurdeb al budam mata goyen kinniŋ yeŋ kwamiŋ. ¹⁵Kuŋbe unŋura ketal urtiŋ al go dufaymiŋ wuk yitiŋde umŋa teŋbe Yesu hinhinde gor keperde hike keneŋbe kafura hamiŋ. ¹⁶Irkeb mata go forok yeke kenamiŋ mar goreb unŋura ketal urtiŋ al goyen daha mat igiŋ hiriŋ goyabe bu fe nene kamamiŋya goyen goke momoŋ yiramiŋ. ¹⁷Irkeb al buda gore mere go nurde kafura heŋbe Yesu goyen, “Naŋa ga tubul teŋ kwayiŋ,” inamiŋ. ¹⁸Gwaha inkeb hakwa hende hurkuŋ hikeb sope iryiŋ al goreb, “Yesu, igiŋ gama gireŋ?” inyiŋ. ¹⁹Irkeb

^f 5:9 Legiyon gote miŋbe fuleŋa mar budam 5,000 niŋ yitiŋ.

Yesu beleŋ ok ma inenbe, “Mulgaŋ heŋ tayge hitte kuŋ Al Kuruŋ beleŋ buninŋ girde sope gira goke momoŋ yirayiŋ,” inyiŋ. ²⁰Irkeb Dekapolis naŋa bana Yesu beleŋ sope iryiŋ goyen tagalde tukuŋ hinhin. Tukukeb al budam al go keneŋ meremiŋ nurdeb diliŋ fot yamiŋ.

Yesu beleŋ garbam bereya bere dirŋen kamtiŋ sope yiryiŋ
(*Mat 9:18-26; Luk 8:40-56*)

²¹Be, Yesu gob sopte mulgaŋ heŋ fe ala kuruŋ siŋa kurhan Kapeneam kuŋ fe siŋare hikeb al budam waŋ gabu irde kalyaŋ keramiŋ. ²²Irkeb gor niŋ Yuda marte gabu ya doyaŋ al kura Yairus gore Yesu hitte wayyiŋ. Waŋ keneŋ yende palap matare Yesu kahaŋ miŋde urguŋ kaŋ kuku teŋbe, ²³“Werne kameŋ teŋ hi. Niŋgeb araŋ waŋ hange kerd unkeb igiŋ heŋ huwaryeŋ,” ineŋ eseŋ mere iryiŋ. ²⁴Irkeb meremiŋ goyen nurde Yesu go yeŋya kwaryum. Kuŋ hikeyab al budam kalyaŋ kerde tawtaw irde gama irde hinhan.

²⁵Be, goya goyenbe bere kura danduku miŋyaŋ goyen al gabu irde kuŋ hinhan bana goŋ kuŋ hinhin. Garbam gobe gayakkek moŋ. Damamiŋbe 12. ²⁶Niŋgeb bere gobe garbam goke guram al budam hitte sope nirnaŋ yeŋ kuŋ heŋbe horamiŋ go hende pasi irde hiyen. Goyenpoga guram kurayen kurayen gore igiŋ ma irde hiyen. Igiŋ hitneŋbe buluŋ wor po heŋ hiyen. ²⁷⁻²⁸Gega Yesuyen mere momoŋ nurde hiyen geb, “Kuŋ amilmiŋ po sisaŋ urdeb igiŋ heweŋ,” yeŋ dufaymiŋ saŋiŋ irdeb kuŋ al buda goyen pota yirde Yesu harhok beleŋ mat amilmiŋ sisaŋ uryiŋ. ²⁹Irkeb dari temeyde hiyen goyen goyare po hubu hiriŋ. Irkeb, “Garbam go nubil tiya,” yeŋ nuryiŋ.

³⁰Be, goya goyen po Yesube tareŋmiŋ tubul teŋ kuriŋ goyen nuryiŋ. Nurdeb al budam gama irde hinhan goyen fulgaŋ kaŋbe, “Ganuŋ beleŋ sisaŋ nura?” yineŋ gusuŋaŋ yiryiŋ. ³¹Irkeb komatmiŋ yago beleŋ, “Al karim ma kalyaŋ gerde haŋ gayen go ma yeneŋbe ‘Ganuŋ sisaŋ nura?’ yeŋ gusuŋaŋ heŋ ha?” inamiŋ. ³²Gega Yesube, “Ganuŋ beleŋ sisaŋ nura?” yeŋ naŋkeneŋ po hinhin. ³³Irkeb bere gobe uliŋde mata forok yiriŋ goyen nurdeb kafura heŋ barbar yeŋbe waŋ Yesu kahaŋ miŋde kateŋ dokolhoŋ yuguluŋ teŋbe, “Ne beleŋ tihim,” ineŋ garbam bikkeŋ hiyen goyen goke fudiŋde po momoŋ iryiŋ. ³⁴Irkeb Yesu beleŋ, “Werne, Al Kuruŋ beleŋ dufayge tareŋ go keneŋbe sope gira geb, kandukge hubu hihi. Niŋgeb amaŋeŋ nurde kwayiŋ,” inyiŋ.

³⁵Be, Yesu beleŋ bere goyen mere irde hikeyabe al kura gabu ya gote doyaŋ al Yirusyen yare mat waŋbe, “Werge bikkeŋ kama geb, tisa ga tuktawaŋ irde ma,” inamiŋ. ³⁶Gwaha inkeb Yesu mere go nurdeb Yairus inyiŋ. “Kafura heŋ ma yo. Al Kuruŋ niŋ po dufayge saŋiŋ irayiŋ.” ³⁷Gwaha inenbe yeŋ gama irde hinhan mar gob tumŋaŋ yakira teŋbe Pita, Yemsa kuliŋ Yonya po yade kuriŋ.

³⁸Be, kuŋ Yairusyen yare forok yeŋbe gor hinhan mar gore esenŋ naŋa teŋ kekew teŋ epte ma teŋ hinhan goyen yinyiŋ. ³⁹Irdeb ya bana hurkuŋbe, “Daniŋ kekew teŋ esenŋ buluŋ po teŋ haŋ? Dirinŋ gabe ma kama. Dulinŋ ferde hi,” yinyiŋ. ⁴⁰Gwaha yinkeb gor hinhan mar gore hinmanŋ iramiŋ. Irkeb Yesu beleŋ ya bana hinhan mar go, “Siŋare kunaŋ!” yineŋ yakira teŋbe dirinŋ gote miliŋya naniŋya irde komatmiŋ karwo go po yade dirinŋ hakwam hinhin bana goŋ hurkamiŋ. ⁴¹Irdeb dirinŋ gote haniŋ tanarde, “Talita, kum!” inyiŋ. (Meremiŋ gote miŋbe, “Bere dirŋeŋ, ne beleŋ ginhem ge. Huwara!”) ⁴²Irkeb goyare po bere dirŋeŋ go huwarde goyaŋ go kuŋ waŋ tiyiŋ. (Yeŋbe damamiŋ 12.) Gwaha tikeb go kenamiŋ marbe diliŋ fot yamiŋ. ⁴³Irkeb Yesu beleŋ, “Mata kenhaŋ gayen gake ma wor wor tagalde tukunayiŋ,” yineŋbe, “Bere dirŋeŋ ga biŋge kura unke niwi,” yinyiŋ.

Yesu go tiyuŋmiŋ Nasaret mat takira tiyamiŋ

6 ¹Be, Yesu beleŋ naŋa bana go tubul teŋ komatmiŋya tiyuŋmiŋ Nasaret hurkamiŋ. ²Irkeb Yuda marte usaŋ nalu Sabat forok yekeb gabu yamiŋde kuŋ saba tagalyiŋ. Sabamiŋ gob hoyanŋ wor po nurdeb hurkuŋkat teŋbe, “Al gabe saba dare niŋ tiyuŋ? Dufaymiŋ yago wor folekkeŋ. Yeŋbe mata tiŋeŋ tiŋeŋ yirde hi! ³Yeŋbe kapenta moŋ? Irde Maria urmiŋ moŋ? Kulinŋ yagobe Yems, Yosep, Yudasyab Saimonya. Haymiŋ yagobe neŋya ma gar tumŋaŋ hityen?” yamiŋ. Irde biŋde buluŋ nurd unamiŋ. ⁴Gwaha tikeb Yesu beleŋ, “Al Kurunŋyen mere basaŋ albe tayŋeŋya tiyuŋmiŋde niŋ marya beleŋ palap ma irde haŋyen,” yinyiŋ. ⁵Irdeb Al Kurunŋyen tareŋde mata tiŋeŋ turŋuŋ yaŋ kura epte ma irtek hiriŋ. Gorbe garbam mar yuŋkureŋeŋ po haniŋ kerd yuneŋ sope yiryiŋ. ⁶Tiyuŋmiŋde niŋ mar beleŋ Yesu mata teŋ hinhin go keneŋ fudinde yeŋ ma nurde hikeb kukuwamiŋeŋ nuryiŋ.

Yesu beleŋ komatmiŋ 12 hulyaŋ yiryiŋ

(*Mat 10:5-15; Luk 9:1-6*)

Be, gwaha teŋbe Yesu tiyuŋ kurayaŋ kurayaŋ kuŋ saba tagalde hinhin. ⁷Irde komatmiŋ 12 go hoy yirke waŋ gabu irkeb irawam irawam hulyaŋ yiryiŋ. Irdeb unŋgura yakira teŋ teŋ tareŋ manaŋ yunyiŋ. ⁸⁻⁹Komatmiŋ yago goyen kuniŋ teŋ hikeb gaha yinyiŋ: “Deŋbe biŋge, kalwa, horaya det hoyanŋ goya ma yawarnayiŋ. Kahaŋ basaŋtiŋ po yerde genuŋ po yanarde kunayiŋ. Uliŋhorbe uliŋde haŋ gog ep. Hoyanŋ ma yawarnayiŋ. ¹⁰Kuŋ tiyuŋde kura forok yeŋbe ya unŋkureŋde po heŋ metenŋ teŋ hinayiŋ. Ya kurar kurar ma hinayiŋ. Irdeb metenŋ pasi irdeb tiyuŋ go tubul teŋ hoyanŋde kunayiŋ. ¹¹Gega tiyuŋ kurar kura kuŋ forok yeke sabatiŋ ma nurde dakira tikeb kahaŋtiŋde niŋ tupi yaraŋ teŋ tiyuŋmiŋ go tubul teŋ kunayiŋ. Gwaha tike gab Al Kurunŋ diliŋde mata buluŋ titekeb gogo gwaha tahaŋ yeŋ nurnayiŋ,” yinyiŋ.

¹²Gwaha yinkeb mel go tubul tej kwamiñ. Irde mata buluñ yubul tej Al Kuruñ niñ biñ mulgañ heñ heñ mata goyen alya bereya hitte tagalde kuñ hinhan. ¹³Irde al budam uñgura ketal yurtiñ goyen yakira tej al budam garbam miñyañ goyen olip fimiñde sam yirde haniñ yerd yunke igiñ heñ hinhan.

Yon Baptais kamyiñ
(*Mat 14:1-12; Luk 9:7-9*)

¹⁴Be, Yesu deñjembe kuruñ wor po heñ tukukeb Galili naña doyañ al kuruñ Herot Antipas manañ nuryiñ. Al kura marbe, “Yon Baptais kamyiñ goyen mulgañ hiyuñ geb, gogo mata tiñej turuñ yañ Al Kuruñ po titek goyen tej hi,” yeñ hinhan. ¹⁵Al kura marbe, “Yeñbe Elaia,” yeñ hinhan. Munañ kurabe, “Al Kuruñyen mere basañ al bikkek hinhan go goyen kura yara,” yeñ hinhan. ¹⁶Be, Herot gobe al beleñ Yesu niñ gwaha mat mere iñgogaha uguñ po tej hinhan go nurdeb, “Yon biñiñ walmeke kamyiñ al go gago sopte huwaruñ,” yiriñ. ¹⁷⁻¹⁸Yeñ beleñ gwaha yiriñ gote miñbe gahade: bikkeñ Yon diwiliñ hinhinya Herot beleñ kuliñ Filipyen berem Herodias kawem tiriñ. Irkeb Yon beleñ goke teñbe, “Kolger bere kawem tawañ gobe gwaha ma tiyayiñ yitiñ goyen tiyañ,” ineñ hinhin. Irkeb Herot beleñ Herodias niñ teñbe meteñ marmiñ hulyañ yirke kuñ Yon haniñ fere tej tukuñ koyare keramiñ. ¹⁹Gwahade geb bere gobe Yon niñ biñde igiñ ma nurde unenñbe, “Daha mat kura maymeke kamwoñ?” yeñ nurde hinhin. Gega yinñenñbe epte moñ. ²⁰Gobe Herot beleñ Yonbe al huwak wor po, irde Al Kuruñyen meteñ al fudinde wor po yeñ kenenñbe palap irde asogo maynayiñ yeñ keñkela doyañ irde hinhin geb, gogo epte ma bere gore mayke kamtek hinhin. Herotbe Yon beleñ saba irke kandukñeñ nurde hiyen gega, sabamiñ go nurtek po irde hiyen.

²¹Be, Herodias beleñ, “Daha mat kura Yon mayeñ?” yeñ nurde hinhin goyen nalu go forok yiriñ. Herot go miliñ kawañ kiryiñ nalu goke teñbe biñge kuruñ teñbe yende meteñ mar gote doyañ mar hoy yirke wayamiñ. Fuleña marte doyañ marya Galili naña doyañ irde hanñyen marya manañ yinke yende yare gabu iramiñ. ²²Goyen nalure Herodias wiriñ beleñ gabu kuruñde gor Herotyia kadom yagoya biñge nene hinhande gor wañ tikiñ heñ gege igiñ wor po tiyyiñ. Irkeb gor gabu iramiñ mar goya Herotyia amañ hamiñ. Irdeb Herot beleñ amañ heñbe bere goyen, “Det kurañ nurdeb mali po gusuñañ nirayiñ. Irkeb igiñ guneñ geb,” inyiñ. ²³Irdeb, “Fudinde wor po ginhem. Naña ne beleñ doyañ irde hime ga manañ igiñ kurhan tubul tej gunmeke doyañ yirde hayiñ,” inyiñ.

²⁴Irkeb bere go miliñ hitte kuñbe, “Da det niñ gusuñañ heweñ?” inkeb miliñ Herodias beleñ, “Kuñbe Yon tonañ niñ inayiñ,” inyiñ. ²⁵Irkeb bere go bemel po Herot hitte mulgañ heñbe, “Hañka ga po Yon biñiñ walde tonañ koronñde kerde tawañ nunayiñ,” inyiñ. ²⁶Gwaha inkeb Herot go

kandukŋeŋ wor po nuryiŋ. Gega haŋkapyā kadam diliŋde mere saŋiŋ po tiyyiŋ goke memya heŋbe Herodias wiriŋ gote mere po gama iryiŋ. 27-28 Irdeb goyare po meten almiŋ uŋkureŋ kura hulyaŋ irke koyare kuŋbe Yon biŋiŋ walde tonan teŋ koronŋde kerde tawaŋ bere go unyiŋ. Unkeb tukuŋ miliŋ unyiŋ. 29 Irkeb Yonyen komatmiŋ beleŋ mere momon go nurdeb waŋ Yon hakwam po tukuŋ mete tiyamiŋ.

Yesu beleŋ al 5,000 biŋge paka yiryiŋ
(*Mat 14:13-21; Luk 9:10-17; Yon 6:1-14*)

30 Be, komatmiŋ 12 kwamiŋ go mulgaŋ heŋ gabu irdeb kalyaŋ kerde mata tiyamiŋ irde al saba yiramiŋ goyen tumŋaŋ Yesu momon iramiŋ. 31 Gwaha teŋ hikeyab al budam po waŋ gabu irke biŋge netek ma hamiŋ. Irkeb Yesu beleŋ, “Deŋ po wake kuŋ usaŋ hetek nanjare kura neya balmiŋ hiniŋ,” yinyiŋ. 32 Be, gwaha yinenbe tumŋaŋ hakwa hende hurkuŋ naŋa al miŋmonŋde kwamiŋ. 33 Gega Yesuya komatmiŋya go al buda kuruŋ go yubul teŋ kukeb naŋa gor kuniŋ tahaŋ yeŋ bebak tiyamiŋ. Niŋgeb taun buda kuruŋ bana go niŋ marbe Yesuya komatmiŋya kuniŋ teŋ hinhan gasuŋde gor yeŋ wa kuŋ forok yamiŋ. 34 Be, Yesu waŋ forok yeŋ yeneŋbe al buda kuruŋ go diriŋ kagew yara buniŋeŋ yinyiŋ. Irdeb det budam niŋ saba yiryiŋ.

35-36 Saba yirke kuŋ kuŋ wawuŋbana wor po hiriŋ. Irkeb komatmiŋ beleŋ waŋbe, “Kidoma dura, irde naŋa gaŋbe tiyuŋ binde miŋmon. Niŋgeb al buda ga yakira tike kuŋ tiyuŋyaŋ ma metenyaŋ gwahade yiŋgeŋ biŋge kura nankenenŋ damu teŋ nenayiŋ,” inamiŋ. 37 Gwaha inkeb Yesu beleŋ, “Moŋ, deŋ beleŋ biŋge kura yunke nenanŋ,” yinyiŋ. Irkeb komatmiŋ beleŋ, “Al buda kuruŋ gabe dahadem biŋge yuntek? 200 denari[§] teŋ gore biŋge damu teŋ yunniŋ yeŋ diniŋ ha?” inamiŋ. 38 Gwaha inkeb wol heŋbe, “Biŋgetiŋbe dahade haŋ? Kuŋ yennaŋ,” yinyiŋ. Irkeb kuŋ yeneŋbe, “Beretbe siptesoŋonŋ, irde makaŋ dapŋa yadibe irawa ga haŋ,” inamiŋ. 39 Irkeb Yesu beleŋ, “Al gabu kuruŋ go pota yirke kuŋ yamuŋyaŋ go keperde tukunaŋ,” yinyiŋ. 40 Irkeb pota yirke keperamiŋ goyen gabu kurabe 50, munaŋ kurabe 100 gwahade ala po keperde tukamiŋ. 41 Irkeb Yesu beleŋ beret siptesoŋonŋya makaŋ dapŋa yadi irawaya goyen yade Al Kuruŋ igiŋ nurd unenbe beret go yubala teŋ komatmiŋ yunyiŋ. Irkeb komatmiŋ beleŋ yade yukuŋ al buda go yunamiŋ. Makaŋ dapŋa mananŋ gwahade po iryiŋ. 42 Be, al buda go nenebe ep wor po nuramiŋ. 43 Irkeb komatmiŋ beleŋ biŋge dikŋeŋ goyen gabu yiramiŋbe tiri 12 gayen makaŋ yirtek hamiŋ. 44 Biŋge namiŋ mar al parguwak po kapyan hamiŋbe 5,000.

[§] 6:37 Denari: Yesu hinhin nature hora deŋembe gogo. 200 denari gobe gagasi 8yen metenŋ damu hora.

Yesu fe yuwalhej hende huwarde komatmiŋ hitte wayyiŋ

(Mat 14:22-23; Yon 6:15-21)

⁴⁵Be, Yesu beleŋ al buda go yakira teŋbe goyare po komatmiŋ yago goyen, “Deŋ wa hakwa hende mehej hej Betsaida kunayiŋ,” yinyiŋ.

⁴⁶Gwaha yinej yubul teŋbe dugu dabayiŋ beleŋ Al Kuruj mere ire yeŋ hurkuriŋ.

⁴⁷Be, anne silsul irkeb hakwa gob fe ala kuruj kahalte forok yiriŋ.

Goyareb Yesube yeŋ unjkurej po dugu dabayiŋde gor hinhin. ⁴⁸Gor hejyabe meŋe kuruj po huwarke hakwa go epte ma kutek hekeb mel goyen foy misiŋeŋ po hej hinhin goyen yenej hinhin. Irdeb naŋa miŋge hekeb kuŋ yene yeŋ fe hende huwarde kuŋbe mel go fole yirde kweŋ tiyiŋ. ⁴⁹⁻⁵⁰Irkeb komatmiŋ beleŋ keneŋbe, “Uŋgura waŋ hi!” yeŋ kafura hej kekew tiyamiŋ. Irkeb bemel po wol hejbe, “Moŋ, ne waŋ hime geb, kafura ma! Tarej henaŋ!” yinyiŋ. ⁵¹Gwaha yineŋbe hakwa hende hurkukeb meŋe kuruj goyen kamiŋ. Irkeb komatmiŋbe keneŋbe diliŋ fot wor po yamiŋ. ⁵²Gobe Yesu beleŋ al budam biŋge yunke namiŋ gote miŋ goyen tonaj tarej irde ma nuramiŋ geb, gogo mata tiyiŋ go manaj bebak ma tiyamiŋ.

⁵³⁻⁵⁴Be, mel go kuŋ siŋa kurhan Genesaret taunde forok yamiŋ. Forok yeŋ hakwa tubul teŋ siŋare kurkukeb gor niŋ al beleŋ Yesu keneŋ bebak tiyamiŋ. ⁵⁵Irdeb buŋ yeŋ kuŋ Yesuyen mere momoŋ goyen tagalde tukukeb naŋa kuruj bana go niŋ mar beleŋ garbam mar kurabe sapir hende yerde, kurabe yadeb Yesu tiyuŋ damde kura hi yeke nurdeb gor po yukuj hinhin. ⁵⁶Yesube tiyuŋyaŋya taunyaŋyabe tiyuŋ mukhej taun siŋayaŋ kuŋ hikeb garbam mar maket gasuŋde gor yawaŋ gabu yirde hinhin. Irdeb eseŋ mere irde, “Yesu, ge beleŋ igiŋ yekeb amilge po sisaŋ urdeb igiŋ hetek,” inamiŋ. Irdeb gwaha teŋbe garbam mar go igiŋ hej hinhin.

Yesu beleŋ asiyeŋ mata walde yuniŋ

(Mat 15:1-9)

7 ¹Be, Farisi marya Moseyeŋ saba mar kuraya Yerusalem tubul teŋ katej Yesu hinhinde gor gabu irde kalyaŋ keramiŋ. ²⁻³Goyarebe Yesuyen komatmiŋ yenaŋiŋbe haniŋ ma haldeya biŋge yanarde nene hinhin. (Yuda marte matabe haniŋ ma haltiŋ gobe tikiŋ miŋyaŋ yeŋ nurde mali ma dula teŋ haŋyen. Niŋgeb yeŋbe asem yagot haniŋ hal hal belhej goyen gama irde haŋyen. Farisibe goyen mata po keŋkela gama irde haŋyen mar. ⁴Go mar gobe gabu karkuwaŋyaŋ al maliya suluk hej kuŋ hinayiŋ goyen waŋ yamiŋyaŋ hejbe fe gemde ga dula teŋ haŋyen. Matamiŋ gwahade budam haŋ. Kuramiŋbe gisu, koronja, fe kaŋguya hal hal belhej miŋyaŋ. Mali mali ma teŋ haŋyen.)

⁵Gwahade ningeb Farisi mar goya Moseyen saba marya beleŋ Yesu gusuŋaŋ iramiŋ: “Daniŋ geb komatge yagobe asininiŋ yagot mata ma gama irde haniŋ ma halde ga dula teŋ haŋ?” inamiŋ. ⁶Irkeb Yesu beleŋ wol heŋbe, “Deŋ usi mar gahade gake teŋbe bikkeŋ Aisaia beleŋ asaŋde kayyiŋ gobe fudinde wor po. Mere kayyiŋbe gahade:

‘Al gabe mohonđe po turuŋ nirde haŋ.

Gega biŋdebe ne niŋ ma wor po nurde haŋ.

Hoyaŋde wor po haŋ.

⁷Mel gabe megen niŋ marte saba po gama irde al saba yirde haŋ.

Mel gabe biŋ hende hende po doloŋ nirde haŋ,’ yitiŋ hi. *Aisaia 29:13*

⁸Deŋbe Al Kuruŋyen saba fudinde go yubul teŋ mata al beleŋ forok yirtiŋ go po ga tareŋ yanarde haŋ,” yinyiŋ.

⁹Irde sopte yinyiŋ: “Deŋbe asetiniŋ yagot mata goyen po gama irniŋ yeŋbe Al Kuruŋyen merebe dindikeŋ ge nurdeb yad yigigiri yird yird dufay epte wor po haŋ. ¹⁰Ga diniŋ hime gate miŋbe gahade: bikkeŋ Mose beleŋ, ‘Mamtiŋya nantiŋya palap yirde hinayiŋ,’ yiriŋ. Munaŋ, ‘Al kura miliŋya naniŋya karan yuryeŋ gobe al go mayke kamyeŋ,’ yiriŋ. ¹¹Gega deŋbe gwaha mat ma alya bereya saba yirde haŋ. Gwaha titteŋbe, ‘Dawet kura mamtiŋya nantiŋya yuntek goyen Al Kuruŋ untek yineŋ go ma yuneŋ hinayiŋ,’ yeŋ saba yirde haŋyen. ¹²Deŋ beleŋ gwaha mat saba yirde hikeb naniŋya miliŋya faraŋ yurde hitek goyen gwaha ma yirde haŋyen. ¹³Irdeb asetiniŋ yagot mata gore bitiŋ pet titiŋ haŋ geb, Al Kuruŋyen merebe dawet mali kura yara irde haŋyen. Mata kurabe gago. Mata budam hoyan wor gwaha po teŋ haŋyen,” yinyiŋ.

Da det beleŋbe Al Kuruŋ diliŋde al buluŋ iryeŋ?

(*Mat 15:10-20*)

¹⁴Be, Yesu beleŋ al gabu iramiŋ go hoy yirdeb sopte gaha yinyiŋ: “Merene keŋkela palŋa irde miŋ nurnaŋ ko. ¹⁵⁻¹⁶Biŋge damiŋbe igiŋ yitiŋ mere goya dula teŋ teŋ matatiŋya goyen keŋkela ma gama irtektebe Al Kuruŋ diliŋde buluŋ diniŋ yeŋ haŋyen gega, gore epte ma buluŋ diriŋeŋ. Dawet al biŋde forok yeke mata buluŋ tiyyeŋ gore gab buluŋ iryeŋ,” yinyiŋ.^h

¹⁷Be, al gabu kuruŋ go yubul teŋ kuŋ ya biŋde hurkuŋbe komatmiŋ yago beleŋ siraw mere gote miŋ niŋ gusuŋaŋ iramiŋ. ¹⁸Irkeb Yesu beleŋ, “Deŋ wor gwahade po, go ma nurde haŋ? Dawet kura teŋ niyyeŋ gore daha mat Al Kuruŋ diliŋde buluŋ iryeŋ? Epte moŋ. ¹⁹Det niyyeŋ gobe kuŋ dufaymiŋde ma kuyeŋ, arayŋeŋde kuŋbe kat kuyeŋ,” yinyiŋ. (Mere gate miŋbe biŋgebe buluŋ miŋmoŋ, netek ala po yeŋ yiryiŋ.)

^h **7:15-16** Asaŋ hoyanđebe gahade hi: “...tikiŋ iryeŋ. ¹⁶Al kura nurtek kenem nuryeŋ,” yinyiŋ.

²⁰Be, Yesu belej saba goyen basaj hej gaha yinyij: “Al biñde mat dufay buluj forok yej mohonje mat kat kuyej gore gab Al Kuruj diliñde buluj iryej. ²¹Al biñde matbe det buluj gahade forok yej hanjen: dufay buluj bulujen, lelep mata, kawe mata, al gasa yirke kamde kamde mata, al berem yaj belej bere hoyaj duwan yird yird mata, ²²⁻²³det ug po yad yad niñ dufay hej hej mata, al buluj yird yird dufay, al usi yird yird mata, uliñde po amaj hetek dufay po gama ird ird mata, kadom igij mat hike yenenje daniñ nenje gwahade moñ yej nurd nurd mata, mere buluj mat tej tej mata, parpar mata, kumhaka mataya gore gab al biñde mat forok yej Al Kuruj diliñde al go buluj irde hanjen,” yinyij.

Fonesia bereyen dufay sañij

(Mat 15:21-28)

²⁴Be, Yesube tiyuj go tubul tej Tair taun bindere kuriñ. Irde al belej gor hi yej nurd nurd goke bada heñbe ya kura goyen bana hurkuj balmij goñ hinhin. Gega yej gor hi mere momoñ gobe gwaha mat kura bana kertek ma hirij. ²⁵Gwahade niñgeb bere kura wirij dirjen uñgura ketal urtij gore Yesuyen mere momoñ nurdeb goyare po waj Yesu kahan miñde katen dokolhoñ yuguluj tiyyij. ²⁶Yeñbe Yuda mar bere moñ. Siria nanare niñ Fonesia taunde gor kawaj hirij. Be, bere gore waj wirij uñgura ketal urtij miñyan goyen Yesu belej uñgura takira tiyyej yej esej mere iryij. ²⁷Irkeb Yesu belej Yuda marya al miñ hoyanja goke tagale yej maya mere mat gaha inyij: “Dirij yubul tike yej wa biñge nenañ. Dirijde biñgebe kulu epte ma yuntek,” inyij. ²⁸Gwaha inkeb bere gore wol heñbe, “Be, Doyaj Al Kuruj. Mere taha gobe fudinde. Gega dirij dula tike biñge diknej katkeb kulu wor nene hanjen,” inyij. ²⁹Irkeb Yesu belej, “Be niñ, mere gobe igij mat wol haha geb igiñge kwa. Uñgura bulujbe werge tubul tiya geb,” inyij. ³⁰Irkeb bere gobe yamiñde kuj wiriñbe uñgura go tubul tej kuke igij hej gasuñde ferde hike kinyij.

Yesu belej al melak kandukya kirminj titminja sope iryij

³¹Be, Yesu go Tair taun siñakyan tiyuj han goyen yubul tej Saidon taunde kuriñ. Gor matbe kurkuj Galili fe ala kuruj siñayan mat kuñbe Dekapolis nanare kuriñ. ³²Irkeb kura mar belej al kura kirminj titminj irde melak kanduk geb mere keñkela ma tej hiyen al goyen tej yej hitte waj haniñ kerde sope ird unwoj yej esej mere iramiñ.

³³Irkeb Yesube al budam hinhan goyen yenenj al go muñ po tej tapat irde haniñ faw yade al gote kirminj bana yerdeb haniñ meyan irde al go melak sisañ uryij. ³⁴Irdeb al go buniñen kenenje Al Kuruj gusuñaj irdeb al go “Efata!” inyij. (Mere gote miñbe “Fegela!”) ³⁵Goyare po al go kirminj wuk yirij, irde melak kanduk go hipirkej heke mere keñkela tiyyij.

³⁶Irkeb Yesu beleŋ al buda go, “Mata kenhaŋ gake tagalde ga ma!” yineŋ hayhay yiryiŋ. Goyenbe hayhay yirmaŋ hiriŋ gega epte moŋ. Mata tiŋeŋ kenamiŋ goke tagalde tururu urde tukuŋ hinhan. ³⁷Yesu beleŋ kirmiŋ titmiŋya melak kandukya miŋyaŋ al sope iryiŋ goyen gote mere momoŋ nurdeb al budam hurkuŋkat teŋbe, “Yeŋ det yirde hi gob igiŋ ala po. Kirmiŋ titmiŋya melak kandukya miŋyaŋ mar wor sope yirke igiŋ heŋ haŋ!” yamiŋ.

Yesu beleŋ al 4,000 biŋge yunyiŋ

(Mat 15:32-39)

8 ¹Be, Yesu go Dekapolis naŋa bana goŋ hinhin goya goyenbe al budam tebaŋ gabu iramiŋ. Goyenbe biŋge go kura netek miŋmoŋ hekeb Yesu beleŋ komatmiŋ yago hoy yirde gaha yinyiŋ: ²“Nebe al buda ga bunineŋ yeneŋ hime. Neya hike kuŋ kuŋ yereŋkek hihi. Irde biŋgem moŋ geb, go kura netek miŋmoŋ haŋ. ³Al kurabe naŋa gisaw mat wayaŋ. Niŋgeb biŋge nenmiŋ moŋ tiyuŋtiŋde kunaŋ yineŋ gob kurabe kuŋ beleŋyaŋ kamnayiŋ,” yinyiŋ. ⁴Gwaha yinkeb komatmiŋ beleŋ, “Tiyuŋ binde miŋmoŋ bana gabe dare araŋ kuŋ biŋge yawaŋ yuntek?” inamiŋ. ⁵Irkeb Yesu beleŋ, “Biŋgebe dahade haŋ?” yineŋ gusuŋaŋ yiryiŋ. Irkeb, “Beretbe 7 haŋ,” inamiŋ.

⁶Gwaha ineŋ yawaŋ unkeb Yesu beleŋ al gabu iramiŋ goyen, “Megen kepernaŋ,” yinyiŋ. Irdeb beret 7 go yade Al Kuruŋ igiŋ nurd uneŋ yubala teŋ al gale yirnaŋ yeŋ komatmiŋ yago yunyiŋ. Yunkeb komatmiŋ yago beleŋ al gale heŋ yunke namiŋ. ⁷Makaŋ dapŋa mukŋeŋ kura goyen wor yade Al Kuruŋ igiŋ nurd uneŋ komatmiŋ yago yunkeb go wor al gale yirde tukamiŋ. ⁸Irkeb al buda kuruŋ goyen biŋge go nene ep wor po namiŋ. Irkeb Yesuyen komatmiŋ yago beleŋ biŋge dikŋeŋ goyen gabu yiramiŋ gobe tiri 7 gwahade makiŋ hetek hamiŋ. ⁹Gor biŋge namiŋ mar goyen al parguwak po kapyar hamiŋbe 4,000. Be, Yesu beleŋ al buda goyen yinke bur yamiŋ. ¹⁰Irkeb Yesuya komatmiŋ yagoya hakwa hende hurkuŋbe Galili fe ala kuruŋ siŋa kurhan Dalmanuta naŋare kwamiŋ.

¹¹Be, goŋ kukeb Farisi mar kura beleŋ waŋ Yesu tuŋaŋ urniŋ yeŋbe, “Al Kuruŋyen tareŋde mata tiŋeŋ turuŋ yaŋ kura dikala dira,” ineŋ gusuŋaŋ iramiŋ. ¹²Irkeb Yesu go biŋde kandukŋeŋ wor po nurdeb, “Daniŋ geb gayenter niŋ marbe Al Kuruŋyen mata tiŋeŋ niŋ po gusuŋaŋ nirde haŋ? Fudinde wor po dinhem. Epte ma mata tiŋeŋ kura dikala direŋ,” yinyiŋ. ¹³Gwaha yineŋbe yubul teŋ hakwa hende mulgaŋ heŋ hurkuŋ fe ala kuruŋ goyen siŋa kurhan wor komatmiŋya kwamiŋ.

Yesu beleŋ Farisi marte mata niŋ maya mere mat yiriŋ

(Mat 16:5-12)

¹⁴Goyabe komatmiŋbe biŋge yad yad niŋ biŋ sir yeke beret uŋkureŋ po teŋ kwamiŋ gobe hakware hinhin. ¹⁵Be, hakwa hende kuŋ heŋyabe Yesu beleŋ Farisi

marya Herotyat saba buluj gore alya bereya budam gote dufayminj buluj irde hiyen goke saba yirde hayhay yirdeb, “Farisi marya Herotyat mata niŋ keŋkela heŋ ga hinayin. Gobe yis¹ yara geb,” yinyin. ¹⁶Gwaha yinkeb komatminj beleŋ, “Biŋge kura ma yade wayhet goke teŋbe gago dina,” yeŋ yinŋeŋ uliŋ sege iramin. ¹⁷Irkeb Yesu beleŋ yeneŋ bebak teŋbe gusuŋaŋ yiryin. “Danin geb biŋgeninin minjmoŋ yeŋ haŋ? Da beleŋ bitin pet teŋ hike dufaytin muŋ kura ma wuk yeŋ hi? ¹⁸Diwiltinŋa kirminŋinŋa minŋaŋ gega, danin mata teŋ hime gayen neneŋ nurde bebak ma teŋ haŋ? ¹⁹Beret siptesoŋoŋ yade yubala teŋ dunmeke 5,000 al yunaŋ gote dikŋeŋbe tiri dahade makin yirtek goyen gabu yiraŋ?” yinyin. Gwaha yinkeb, “Tiri 12,” inamin. ²⁰Irkeb sopte po, “Munaŋ beret 7 yade yubala teŋ dunmeke 4,000 al yunhaŋ gote dikŋeŋ gabu yirhaŋ gobe tiri dahade makin hetek hahaŋ?” yinkeb, “Tiri 7,” inamin. ²¹Gwaha inkeb, “Go yeneŋbe dufaytin muŋ kura ma wuk yeŋ hi?” yinyin.

Yesu beleŋ Betsaida niŋ al diliŋ titminj kura sope iryin

²²Be, Yesuya komatminŋa gob kuŋ Betsaida taunde forok yamin. Irkeb al kura beleŋ al diliŋ titminj kura goyen tawaŋbe, “Al ga sope ird ird niŋ sisaŋ ura,” ineŋ eseŋ mere iramin. ²³Irkeb Yesu beleŋ al diliŋ titminj goyen haniŋde tanarde tiyuŋ siŋare tukuriŋ. Tukuŋbe diwiliŋde meyaŋ teŋ haniŋ beleŋ busaŋ heŋbe, “Det kura yenha?” ineŋ gusuŋaŋ iryin. ²⁴Gusuŋaŋ irke naŋkeneŋ tukuŋbe, “Albe he yara yeneŋ himeke kuŋ waŋ teŋ haŋ,” inyin. ²⁵Irkeb sopte po Yesu beleŋ al go diliŋ hende haniŋ kiryin. Irde haniŋ tubul tikeb diliŋ hol irde naŋkinyin. Irdeb diliŋ wuk yeke keŋkela wor po dawet yinyin. ²⁶Irkeb Yesu beleŋ, “Betsaida taunde gar ma mulgaŋ heŋ kwayin,” inkeb yamiŋde kuriŋ.

Pita beleŋ Yesube al gwahade yeŋ tagalyin

(Mat 16:13-20; Luk 9:18-21)

²⁷Be, Yesu go komatminj yagoya Betsaida taun goyen tubul teŋ Sisaria Filipai taun gote siŋakyaŋ tiyuŋ mukŋeŋ mukŋeŋ goyen fole yirde kuŋ heŋyabe, “Ne gakeb al beleŋ ganuŋ yeŋ haŋ?” yineŋ komatminj gusuŋaŋ yiryin. ²⁸Irkeb komatminj beleŋ wol heŋbe, “Al kura beleŋ gebe Yon Baptais, kurabe Elaia, munaŋ kurabe Al Kurunyen mere basaŋ al kura yeŋ haŋ,” inamin. ²⁹Irkeb Yesu beleŋ, “Munaŋ deŋbe daha yeŋ haŋ?” yinkeb Pita beleŋ wol heŋbe, “Gebe Mesaia,” inyin. ³⁰Gwaha inkeb Yesu beleŋ, “Al kura momoŋ ma yirnaŋin,” yineŋ hayhay yiryin.

Yesu beleŋ kamde kamdeŋ ge bebak yiryin

(Mat 16:21-28; Luk 9:22-27)

³¹Be, Yesu go saba yirde heŋyab gaha yinyin: “Ne Al Urminj gabe ulne misiŋ kurunj kateŋ. Irkeb Yuda marte doyaŋ mar parguwakya Al Kurunj

¹ 8:15 Yisbe dirneŋ muŋ kura palawa bana kerkeb hilyaŋ kuyeŋ go gwahade yara Herotyat Farisi maryat mata buluŋbe gwahade goke Yesu beleŋ hayhay yiryin.

dolon ird ird mata doyan marte karkuwanjmiya Moseyen saba marya kuruj goreb ne niñ bin ar yekeb sabane nurtek ma yirkeb mununke kamenj. Goyenbe yerenkek hekeb sopte huwarenj,” yinyinj. ³²Yenbe mere kenjelak po bebak yiryinj. Irkeb Pita belej, “Geya muñ kura mere tiyye,” inenj Yesu yen muñ po ten tapat irde inenj tenbe, “Mere taha gobe iginj ma nurhem,” inyinj. ³³Irkeb Yesu belej piñenj nurd unej harhok unejbe komatmiñ hoyanj goyen yenenj henja Pita goyen inenj tenbe, “Satan, wañ harhokne belej kwa! Begerbe alyen dufay belej po makin hitinj hi. Al Kurujyen dufay niñ ma nurde ha,” inyinj.

³⁴Gwaha inenbe al buda kuruj gor hinhan goyen hoy yiryinj. Irkeb wañ komatmiña gabu irde keperamiñ. Irkeb Yesu belej tumjanje gaha yinyinj: “Al kura ne gama nire yen nurdeb yingenj ge ma nurde ne niñ ten iginj kanduk ten kamenj yen nurde gab gama niryen. ³⁵Ninģeb al kura yingenj ge po nurde hiyenbe Al Kuruj belej piñenj nurde unkeb Al Kurujyen diriñ ma hiyyenj. Gega al kura neya mereneya niñ nurde goyen goke kanduk tiyyenj gobe Al Kuruj belej iginj nurde unyen. ³⁶Al kura merene ma gama irde megen niñ samuñ yade pipkatoka irde, ‘Ne ep hihim,’ yen nuryenj gega, kame kamde kak alare kuyenj gobe iginj ma dahade? Gobe iginj moñ. ³⁷Al kura kak alare kuyenbe dahadem detmiñ gore kak alare mat tumulgañ tiyyenj? Go wor epte moñ. ³⁸Al Kuruj harhok unej mata buluñ po ten hañ nalure gayen al kura ne niñ memya henj merene ma tagalde hiyenj gobe kame ne Al Urmiñ gare wor Nanner tareñ turuj yañ ten miyoñmiñ wukkenj wor po goya katenya goyenbe al gote matamiñ goyen wol henbe yen ge memya hewenj,” yinyinj.

9 ¹Be, Yesu go gwaha yinenbe, “Fudinde wor po dinhem. Deñ gar huwarde hañ gayen kuratiñ kurabe go ma kamdeya Al Kuruj belej aly bereyamiñ doyan yird yird goyen sañinj miñyañ forok yeke kennayinj,” yinyinj.

Yesu uliñ hoyanj hiriñ
(*Mat 17:1-13; Luk 9:28-36*)

²Be, gor mat naña fay 6 hubu hekeb Yesu belej komatmiñ karwo Pita, Yonyabe Yemsa po yade dugu kurunde kura gor hurkuriñ. Gorbe yen po hinhan. Irkeb Yesu go mel gote diwiliñ mar po uliñ hoyanj heke kenamiñ. ³Irkeb Yesuyen uliñhor yerde hinhin gobe tukfor yen faykek wor po henbe sorñoj miñyañ hiriñ. Megen niñ al belej det kura halke epte ma wor po gwahade hiyyenj. ⁴Gwaha ten hikeb goyare po Moseya Elaiaya forok yen Yesuya mere ten hike komatmiñ belej yenamiñ. ⁵Irkeb Pita belej, “Tisa, garbe iginj wor po ninģeb, ya yok karwo yirtek. Kurabe ge niñ, kurabe Mose niñ, irde kurabe Elaia niñ,” inyinj. ⁶Go inyinj gobe Pitaya kadam waranja goyen kafura wor po henbe gwaha kura yihim yen ma nurdeya gogo mali ga mere tiyyinj. ⁷Irkeb goyare po gagap

kura forok yeŋ alu yuryiŋ. Gagap bana goŋbe al melak kura nuramiŋ. Meremiŋbe gahade: “Gabe Urne. Yeŋbe bubulkuŋne wor po. Niŋgebe yende mere po nurde gama irde hinayiŋ,” yiriŋ. ⁸Be, mere go nurdeb goya goyen po naŋkenamiŋ gega al kura ma kenamiŋ. Yesu po hike kenamiŋ.

⁹Be, Yesuya komatmiŋya gobe gasuŋ hinhan goyen tubul teŋ mulgaŋ heŋ katamiŋ. Kateŋ heŋyabe Yesu beŋe, “Mata kenhaŋ gake al hoyan kura momoŋ ma yirnaŋiŋ. Ne Al Urmiŋ gare metere mat huwareŋ goyare gab momoŋ yirnaŋiŋ,” yineŋ hayhay tareŋ po yiryiŋ. ¹⁰Irkeb meremiŋ go nurdeb komatmiŋbe yiŋgeŋ uliŋ, “Al kamtiŋbe dahadem metere mat huwareŋ?” yeŋ kadom gusuŋaŋ gird tiyamiŋ. ¹¹Irdeb, “Munaŋ daniŋ geb Moseyen saba mar beŋe al kura Elaia beŋe metere teŋ hinhin gwahade metere titek al go wa meheŋ heŋ wake gab Mesaia wayyeŋ yeŋ haŋyen?” ineŋ Yesu gusuŋaŋ iramiŋ. ¹²⁻¹³Irkeb Yesu beŋe wol heŋbe gaha yinyiŋ: “Al kura Elaia yara metere titek al go wa meheŋ heŋ waŋ det sope iryeŋ yeŋ haŋyen gobe fudinde. Goyenbe al gobe yeŋ wa bikken wayuŋ. Irkeb Al Kurunyen asaŋde mere kayamiŋ gwahade goyen po al beŋe gwaha irtek yeŋ nurde hinhan gwahade po buluŋ buluŋ iraŋ. Niŋgebe ne Al Urmiŋ gayen wor Al Kurunyen asaŋde mere kayamiŋ gwahade po kanduk kuruŋ teŋ ulne misiŋ kateŋ kameŋ,” yinyiŋ.

Yesu beŋe diriŋ unŋgura miŋyaŋ sope iryiŋ

(Mat 17:14-21; Luk 9:37-43a)

¹⁴Be, mel goyen mulgaŋ heŋ kateŋbe al buda kuruŋ gabu irtiŋ bana goŋ Yesuyen komatmiŋ hoyan goya Moseyen saba marya kadom mohonŋde teŋ hike yenamiŋ. ¹⁵Gor gabu iramiŋ mar gobe Yesu wayeŋ tiya yeŋ ma nurde hikeya wake keneŋbe hurkuŋkat wor po teŋbe pere irniŋ yeŋ kup yeŋ kwamiŋ. ¹⁶Irkeb, “Daniŋ kadom mohonŋde teŋ haŋ?” yineŋ gusuŋaŋ yiryiŋ. ¹⁷Irkeb gabu kuruŋ bana gor al kura beŋe wol heŋbe, “Tisa, urne unŋgura beŋe ketal urke mere ma teŋ hiyen goyen ge hitte teŋ wayhem. ¹⁸Kurarebe unŋgura gore teŋ megen temeyke dadilok mohonŋde ala heŋ misiŋ ŋirŋedek irde uliŋ horam heŋ hiyen. Komatge yago gayen, ‘Unŋgura go takira tinaŋ,’ yinhem gega yeŋbe epte moŋ,” inyiŋ. ¹⁹Irkeb Yesu beŋe meremiŋ goyen wol heŋbe, “Deŋbe dahade? Dufaytiŋ tareŋ moŋ. Gayak ga deŋya hityen? Diriŋ go tawanaŋ,” yinyiŋ.

²⁰Be, diriŋ go Yesu hitte tawayamiŋ. Tawakeb unŋgura gore Yesu keneŋ goyare po diriŋ go hambor irde teŋ megen kaŋ kaŋ irkeb dadilok hol yiriŋ. ²¹Irkeb Yesu beŋe diriŋ naniŋ goyen, “Garbam ga daha naŋa tiriŋ?” ineŋ gusuŋaŋ iryiŋ. Irkeb wol heŋbe, “Diriŋ haŋkapok hinhinya po. ²²Unŋgura beŋe maymeke kami yeŋ fe alaya kak alaya bana teŋ temeyde hiyen. Niŋgebe ge epte kenem bunineŋ dirde faraŋ dura,” inyiŋ. ²³Gwaha inkeb Yesu beŋe wol heŋbe, “Tareŋ miŋmoŋ yeŋ neneŋ

gusujan nirde ha? Al kura ne niŋ dufaymiŋ saŋiŋ irde hiyeŋbe det kura epte ma meteneŋ iryeŋ,” inyiŋ. ²⁴Irkeb naniŋ beleŋ goyare po wol heŋbe, “Dufayne ge niŋ tareŋ irhem geb, faran nurke dufay budam budam ma heweŋ,” inyiŋ.

²⁵Be, Yesu go al buda goyen waŋ gabu irke yeneŋbe uŋgura goyen ineŋ teŋbe, “Kirmiŋ titmiŋya mohonj kattiyat uŋgura, ne gare ginhem, diriŋ ga tubul teŋ kat kwa! Irde ma wor po mulgaŋ hawayiŋ!” inyiŋ. ²⁶Irkeb uŋgura go kekew teŋ diriŋ goyen hambor buluŋ po irde tubul teŋ kat kuriŋ. Diriŋ go kenamiŋbe ugalam moŋ, kamtiŋ yara heke keneŋbe al kura beleŋ, “Ey, kama!” yamiŋ. ²⁷Gega Yesu beleŋ haniŋde tanardeb isan heke huwariŋ.

²⁸Be, go kamere Yesube komatmiŋya ya biŋde hurkamiŋ. Hurkuŋbe komatmiŋ yago beleŋ, “Dahade niŋgeb neŋbe uŋgura go takira titekeb mereniŋ ma nura?” ineŋ gusujan iramiŋ. ²⁹Irkeb Yesu beleŋ wol heŋbe, “Uŋgura gahade gab Al Kurun gusujan irke tareŋ dirke gab igiŋ takira tinayiŋ,” yinyiŋ. ³⁰Be, Yesube al yeneŋ yilwa yirde balmiŋ kuŋ hiniŋ yeŋ nurdeb tiyuŋ go tubul teŋ balmiŋ Galili naŋa goyen fole iramiŋ. ³¹Gobe komatmiŋ buda goyen saba yirde hinhin geb gogo tiyyiŋ. Yeŋbe komatmiŋ saba yirde heŋyabe, “Ne Al Urmiŋ gabe al kura beleŋ tagalde nunke megen niŋ al beleŋ nad buluŋ buluŋ nirde mununke kameŋ. Gega yereŋkek hekeb sopte huwareŋ,” yinyiŋ. ³²Goyenpoga komatmiŋ yagobe mere gote miŋ bebak ma tiyamiŋ. Irdeb miŋ goyen tagalke buluŋ nurtek yeŋbe gusujan ird ird niŋ kama hamiŋ.

Ganuŋ albe deŋem kuruŋ wor po?

(Mat 18:1-5; Luk 9:46-50)

³³Be, Yesuya komatmiŋya Kapeneam taunde forok yamiŋ. Irdeb ya bana hurkuŋbe, “Belenbe daniŋ kadom mohonjde tahaŋ?” yineŋ komatmiŋ yago gusujan yiryiŋ. ³⁴Goyenpoga mel gobe waŋ heŋya, “Ganuŋbe folek geb, doyaŋ al hiyyeŋ?” yeŋ kadomde tiyamiŋ geb, goke memya heŋ mere ma tiyamiŋ. ³⁵Irkeb Yesu go keperdeb komatmiŋ 12 tumŋaŋ hoy yirdeb, “Be, al kura, ‘Al Kurun diliŋde deŋne yaŋ hewe,’ yiyyeŋbe yiŋgeŋ ge ma nurdeb al hoyan kuruŋ gote meteneŋ almiŋ hiyyeŋ,” yineŋ saba yiryiŋ. ³⁶Irdeb Yesu beleŋ diriŋ diriŋ kura komatmiŋ yago hinhande gor hinhin goyen teŋ besa irdeb, ³⁷“Ne niŋ teŋ al buluŋ kura diriŋ gahade gayen gargar iryeŋ gobe ne niryeŋ. Munaŋ al kura ne igiŋ igiŋ niryeŋ gobe ne po ma niryeŋ. Nad nerke wamiŋ al goyen manan igiŋ igiŋ iryeŋ,” yinyiŋ.

³⁸Irkeb Yon beleŋ nurdeb, “Tisa, al kura nende al moŋ gega, deŋger uŋgura yakira teŋ hike keneŋbe utaŋ irtiŋ,” inyiŋ. ³⁹Irkeb Yesu beleŋ wol heŋbe, “Utaŋ ma irnayiŋ. Al kura ne deŋner Al Kurunyen saŋiŋde mata tiŋeŋ turŋuŋ yaŋ forok iryeŋ gobe daha mat tigiri teŋ buluŋ niryeŋ? Epte

monj. ⁴⁰Al kura asogo ma diryenj al gobe nende al. ⁴¹Fudinde wor po dinenj hime. Al kura denj denenbe Mesaiayen albe gago yenj bebak tenbe ne niñ tenj fe kura dunyenj gobe murunggem tiyyenj wor po,” yinyinj.

⁴²Be, Yesu belej sopte gaha yinyinj: “Goyenpoga dirinj gahade gayen ne niñ dufay hekeya al kura belej mata bulunj tiyi yenj biñ tiyyen al gwahade gobe hora kurunj kura tenj biñinde feñ tenj makañ alare temeytek yara. ⁴³⁻⁴⁴Niñgeb hange kura mata bulunđe gukukeb walayinj. Hange unjureñ po tenj Al Kurunj hitte hurkayinj wor iginj. Monjo hange irawakde hiriryenj gore kak kamde ma hiyen bana gonj gukuriryenj.^j ⁴⁵⁻⁴⁶Kahange kura belej mata bulunđe gukukeb walayinj. Kahange titminj heñ Al Kurunj hitte hurkayinj wor iginj. Monjo irawakde hiriryenj gobe gore kak alare gukuriryenj. Niñgeb hangeya kahangeya kurhan kura waltijenbe mata bulunj huginenj yubul tiyayinj gogo.^k ⁴⁷Delge kura belej mata bulunđe gukukeb marayinj. Delge unjureñ po henya Al Kurunj hitte hurkayinj wor iginj. Monjo delge tuminj hiriryenj gobe gore kak ala bana gukuriryenj. ⁴⁸Gorbe kundu huginenj benbon tenj hanjen. Irdeb kak gobe go ma kamde hiyen. ⁴⁹Dapña faw urke bida ma heñ ulyande po hanjen go gwahade goyen, kak alare hañ mar kurunj gobe kak belej huginenj kunga yirtinđe gwahade po hinayinj. ⁵⁰Be, fawbe det iginj gega, hapek hubu hekeb daha mat hapek go sopte gasunenj irnayinj? Niñgeb dindikenj goyen faw hapek minyañ gwahade yara heñ gab hinayinj. Irdeb bitinj kamke awalikde po hinayinj,” yinyinj.

Ire unya heñ heñ mata
(*Mat 19:1-12; Luk 16:18*)

10 ¹Be, Yesuya komatminj yagoya taun go tubul tenj Galili nanare mat Yudia nanare kwaminj. Irdeb gor mat kuñ Yodan fe siña kurhan Perea nanare kwaminj. Kukeb al budam sopte yenj hitte wañ gabu iraminj. Irkeb yende matabe gwahade go niñgeb saba yiryinj.

²Gwaha tenj hikeyabe Farisi mar kura wañ tunanj urninj yenbe, “Al belej berem takira tiyyenj gobe Moseyen sabareb mata huwak yitinj?” inenj gusunanj iraminj. ³Irkeb Yesu belej wol henbe, “Goyen mata gokeb Mose belej asañde daha tenj hinayinj yenj kayyinj?” yinyinj. ⁴Irkeb mel gore wol henbe, “Moseyen sabarebe, ‘Al kura berem takira tiye yenbe iginj asañ kañ unenbe takira tiyyenj,’ katinj hi,” inaminj. ⁵Irkeb Yesu belej, “Tonanñij tareñ wor po saba ma nurtek goke tenbe Mose belej asañ gogo kañ dunyinj. ⁶Gega hañkapywa wor po Al Kurunj belej megenya nanñinnya irde det kurunj gayen yiryinjabe al irde bere irde iryinj. ⁷Gwahade niñgeb

^j 9:43-44 Asañ kurarebe: ... gukuriryenj. ⁴⁴ Gorbe kundu huginenj benbon tenj hinayinj. Irdeb kak gobe go ma kamde hiyen. ^k 9:45-46 Asañ kurarebe: ... gukuriryenj. ⁴⁶ Gorbe kundu huginenj benbon tenj hinayinj. Irdeb kak gobe go ma kamde hiyen.

albe naniŋya miliŋya yubul teŋ kuŋ beremya gabu hiriryen. ⁸Irdeb irawa goyen uŋkurenŋ po hiriryen. Niŋgeb irawa goyen hoyanŋ hoyanŋ ma hiriryen. Uŋkurenŋ po hiyyen. ⁹Gwahade geb Al Kuruŋ beleŋ bereya alya gabu heŋ heŋ mata goyen irtinŋ go deŋ al beleŋ epte ma walde bur yirnayinŋ,” yinyinŋ.

¹⁰Be, sopte hurkuŋ ya biŋde heŋyabe komatminŋ yago beleŋ mere goke gusuŋanŋ iraminŋ. ¹¹Irkeb Yesu beleŋ wol heŋbe, “Al kura berem takira teŋ bere hoyanŋ tiyyenŋ gobe Al Kuruŋ beleŋ al gobe berem bikkek tubul teŋ leplep mata tiya yeŋ kinyen. ¹²Bere kura uŋ mekerde al hoyanŋ tiyyenŋ gobe Al Kuruŋ beleŋ bere gobe uŋ bikkek tubul teŋ leplep mata tiya yeŋ kinyenŋ,” yinyinŋ.

Yesuya dirinŋ mukneŋya
(*Mat 19:13-15; Luk 18:15-17*)

¹³Be, al kura mar beleŋ dirinminŋ mukneŋ goyen Yesu beleŋ haninŋ tonanŋde yerde tareŋ heŋ heŋ ge guram yiri yeŋ yawaŋ hikeyabe komatminŋ yago beleŋ al goyen yineŋ tiyaminŋ. ¹⁴Gwaha yirke yeneŋbe Yesu go biŋ ar yekeb komatminŋ weŋ goyen gaha yinyinŋ: “Dirinŋ mukneŋ go yubul tike ne hitte wanaŋ. Utaŋ yirde ma. Al kura Al kuruŋyen dirinŋ wor po hiniŋ yeŋbe dirinŋ mukneŋ yara henayinŋ. ¹⁵Gabe fudinde wor po dineŋ hime. Dirinŋbe tayneŋ yufuk bana haŋ gwahade goyen al kura Al Kuruŋyen yufuk bana hime yeŋ ma nuryeŋbe epte ma Al Kuruŋyen dirinŋ hiyyenŋ,” yinyinŋ. ¹⁶Gwaha yineŋbe dirinŋ mukneŋ go yade besa yirde haninŋ tonanŋanŋ yerde guram yirde saŋinŋ yiryinŋ.

Samuŋminŋ budam minŋyanŋ al
(*Mat 19:16-30; Luk 18:18-30*)

¹⁷Be, Yesube gor mat hako ga kweŋ teŋ hikeyabe al kura kup yeŋ waŋbe kahaŋ minŋde kateŋ dokolhoŋ yuguluŋ teŋbe, “Tisa, gebe al iginŋ. Goyenbe neb daha teŋ gab iginŋ Al Kuruŋyen dirinŋ wor po hewenŋ?” inenŋ gusuŋanŋ iryinŋ. ¹⁸Irkeb Yesu beleŋ wol heŋbe, “Gebe ne neneŋbe megen niŋ saba al iginŋ kura yeŋ nurd nunenŋ ha? Moŋ, nebe megen gar niŋ moŋ. Megen niŋ al kura iginŋ minŋmoŋ, Al Kuruŋ muŋ po gab iginŋ. ¹⁹Gebe Moseyen sababe nurde ha. Al ma gasa yirke kamnayinŋ, bere hoyanŋ kura duwan ma yirde hayinŋ, kawe ma teŋ hayinŋ, al usi ma yirde hayinŋ, al usi yirde detminŋ ma yade hayinŋ, momkeya nanakeya palap yirde hayinŋ,” inyinŋ. ²⁰Irkeb al goreb, “Tisa, ne dirinŋ heŋya po saba goyen nurde gama irde waŋ waŋ gago hime,” inyinŋ. ²¹Irkeb Yesu beleŋ al go keneŋbe biŋde bubulkuŋne wor po yeŋ nurde unenŋbe, “Gebe dawet uŋkurenŋ po soŋ heŋ ha geb, kuŋ samuŋge tumŋanŋ yukunŋ al buninŋenŋ det minŋmoŋ mar goyen yuneŋ tukayinŋ. Irkeb Al Kuruŋ beleŋ nere hihi yeŋ ginyenŋ. Irke gab waŋ gama nirayinŋ,” inyinŋ. ²²Gega al gob samuŋminŋ budam wor po geb, mere goke kandukneŋ nurdeb biŋ bida heke kuriŋ.

²³ Gwaha tike kenejbe Yesu go komatmiņ yago goyen, “Al samuņmiņ budam miņyaņ marbe Al Kuruņ dirņeņ weņ heņ heņbe meteneņ wor po,” yiniņ. ²⁴ Be, mel gob al samuņmiņ budam gobe Al Kuruņ beleņ guram irkeb gogo yeņ nurde haņyen geb, mere go nurdeb dinonj kok yamiņ. Irkeb Yesu beleņ gaha yiniņ: “Mel, Al Kuruņ dirņeņ weņ heņ heņbe meteneņ wor po. ²⁵ Dapņa kuruņ kamel beleņ amil haraņ heņ heņ kutum yameņ dirņeņ muņ wor po goyen bana epte ma hurkuyeņ. Gwahade goyen po al samuņmiņ budam wor Al Kuruņ beleņ alya bereyamiņ doyaņ yirde hi bana goņ epte ma hurkunayiņ. Niņgeb dawet irawa gobe tumņaņde meteneņ gega, damiņbe meteneņ wor po? Gobe samuņmiņ budam miņyaņ al gore Al Kuruņ beleņ alya bereyamiņ doyaņ yirde hi bana goņ hurkuņ hurkuņ gobe meteneņ wor po,” yiniņ. ²⁶ Gwaha yinkeb komatmiņ gob hurkuņkat teņbe, “Niņgeb ganuņ po ga epte Al Kuruņ dirņeņ weņ henayiņ?” yeņ yingēņ uliņ kadom gusuņaņ gird tiyamiņ. ²⁷ Irkeb Yesu beleņ yeneņbe, “Gobe alyen tareņde epte moņ. Gega Al Kuruņyen tareņdebe epte. Al Kuruņbe al beleņ meteneņ nurde haņ goyen igiņ ala yiryēņ,” yiniņ.

²⁸ Be, gwaha yinkeb Pita beleņ, “Neņbe gama girniņ yeņ detniniņ tumņaņ yubul titiriņ,” inyiņ. ²⁹⁻³⁰ Irkeb Yesu beleņ gaha yiniņ: “Fudinde wor po dineņ hime. Al kura neya ne niņ yitiņ mere igiņya goke teņ yamiņ, kuliņya itiņya, haymiņya babamya, miliņya naniņya, dirņeņ weņ, irde meteneņmiņ yubul tiyyeņ al gobe megen hiyeņya gayen wolmiņeņbe det yubul tiyyeņ goyen folek kuruņ wor po yawaryeņ. Gega go hendebe kanduk manaņ teņ hiyeņ. Irdeb kame Al Kuruņya awalik heņ yeņya hugiņeņ hiriryēņ. ³¹ Goyenpoga al budambe al hoyaņ folek deņniniņ yaņ yeņ nurde haņ mar gobe Al Kuruņ beleņ deņem moņ yiryēņ. Munaņ al kura al maliņeņ yeņ nurde haņ marbe Al Kuruņ beleņ deņem yaņ wor po yiryēņ. Gobe al budam meheņ henayiņ marbe kame wor po henayiņ, munaņ al kamere haņ marbe meheņ henayiņ go gwahade goyen,” yiniņ.

Yesu kamde kamdemiņ ge sopte momoņ yiryiņ

(Mat 20:17-19; Luk 18:31-34)

³² Be, Yodan fe tubul teņ Yerusalem hurkuņ heņyabe Yesu go meheņde kuņ hinhin. Irkeb komatmiņbe Yesu go Yerusalem hurkuņ hurkuņ niņ kafura ma heņ kuņ hike keneņbe diliņ fot yamiņ. Irkeb al hoyaņ kame gama irde hinhan mar go manaņ kafura hamiņ. Irkeb Yesu gore sopte komatmiņ muņ po yapat yirdeb mata gwahade forok yeņ nunyeņ yeņbe goyen goke gaha yiniņ: ³³ “Neņ Yerusalem hurkuņ hite gayenbe ne Al Urmiņ gayen gor niņ mar beleņ Al Kuruņ doloņ ird ird mata doyaņ marte karkuwaņmiņya Moseyen saba maryat haniņde nernayiņ. Irkeb mel goreb kamyēņ po yeņbe nad Yuda mar moņ al miņ hoyaņ haniņde nernayiņ. ³⁴ Irkeb mel gore sukal nirde meyaņ nirde nusulak teņ teņbe mununke kameņ. Goyenbe yereņkek hekeb huwareņ,” yiniņ.

Yemsya Yonyat gusunaj
(*Mat 20:20-28*)

³⁵ Be, Sebedi urmiņ waraņ Yemsya Yonya beleņ Yesu hitte warņbe, “Tisa, dawet kuraņ gusunaj giryekeb igiņ irde dunayiņ?” inaryum. ³⁶ Irkeb Yesu beleņ, “Da ird duni yeņ nineņ har?” yeņ gusunaj yiryiņ. ³⁷ Gwaha yinkeb wol heņbe, “Gebe deņge turņuņ yaņ hiyyeņya goyenbe deyya wa deņdereņ yaņ dirayiņ. Irkeb geya sosora heņbe al doyaņ yirde hitek,” inaryum. ³⁸ Irkeb Yesu beleņ, “Meretiriņ gobe miņ ma nurde heņya gusunaj nirde har. Niņgeb ne beleņ Al Kuruņyen dufay gama irde kanduk teweņ gwahade goyen der manaņ igiņ tiriryeņ?” yinyiņ. ³⁹ Irkeb wol heņbe, “Deyya epte,” inaryum. Irkeb Yesu beleņ gaha yinyiņ: “Ne beleņ Al Kuruņyen dufay gama irde kanduk kuruņ teweņ gwahade gobe der wor igiņ tiriryeņ. ⁴⁰ Gega deņtiriņ yaņ heņ ketalner derd derd saņiņ pota irde duneņ duneņ gobe nere meteņ moņ. Tareņ gobe Al Kuruņ beleņ al basaņa yirtiņ mar goyen yunyeņ,” yinyiņ.

⁴¹ Be, komatmiņ kadom 10 gore mere go nurdeb Yemsya Yonya niņ biņ ar yamiņ. ⁴² Irkeb Yesu beleņ tumņaņ hoy yirdeb gaha yinyiņ: “Megen niņ doyaņ mar karkuwanbe al doyaņ yirhet usi teņ yiņgeņ ge po nurde kanduk yuneņ haņyen. Irde yende meteņ marmiņ manaņ deņniņiņ yaņ hihit yeņ nurdeya al kanduk yuneņ haņyen. ⁴³ Gega deņbe gwahade moņ. Al kura deņ haņ bana gayen fole dirde ne po deņne yaņ hewe yeņ nuryeņ al gobe yiņgeņ ge ma nurde dende meteņ al po hiyyeņ. ⁴⁴ Niņgeb al kura doyaņ al hewe yeņbe yiņgeņ ge ma nuryeņ. Irde almiņ ge po dufay heņ yende meteņ al po hiyyeņ. ⁴⁵ Gwahade niņgeb ne Al Urmiņ gayen wor al beleņ igiņ igiņ nirnaņ yeņ ma katmiņ. Ne beleņ po ga al igiņ igiņ yire yeņ katmiņ. Irdeb darine wok irde kameņ goreb alya bereya kuruņ gate mata buluņmiņ halde yunyeņ yeņ katmiņ,” yinyiņ.

Batimeus diwiliņ titmiņ goyen naņkinyiņ
(*Mat 20:29-34; Luk 18:35-43*)

⁴⁶ Be, Yesu go gwaha teņbe komatmiņya Yeriko taunde kwamiņ. Kuņ taun go tubul teņ kuņ hikeyabe al kura diliņ titmiņ goyen beleņ siņare keperde al dawet kaņaņ yirde hinhin. Al gobe Batimeus, Timeus urmiņ. ⁴⁷ Be, al gobe, “Nasaret niņ al Yesu war hi,” yeke nurdeb hokde po, “Yesu, Dewit urmiņ, ne ga neneņ faraņ nura be!” yiriņ. ⁴⁸ Irkeb al budam beleņ ineņ teņ, “Bada hawa!” inamiņ. Gega goyabe ug po hoy yiriņ. “Dewit urmiņ, ne ga neneņ faraņ nura be!” yiriņ. ⁴⁹ Irkeb Yesu kuņ hinhin goyen meremiņ go nurdeb tek yeņ huwaryiņ. Huwardeb, “Al go inke wayi,” yinyiņ. Irkeb al diliņ titmiņ goyen, “Ge niņ yeņ hi geb, amaņ heņ huwara!” inamiņ. ⁵⁰ Irkeb amaņ heņbe meņe diba uliņhormiņ hende niņ goyen tuguya teņ temeyde kururu uneņ Yesu hitte kuriņ. ⁵¹ Kukeb Yesu beleņ,

“Daha niri yeŋ hoy nirde ha?” inyiŋ. Irkeb al diwiliŋ titmiŋ goreb, “Tisa, naŋkenmewoŋ wor po yeŋ nurde hime,” inyiŋ. ⁵²Gwaha inkeb Yesu beleŋ, “Dufayge ne niŋ tareŋ irha goke sope girhem geb kwa!” inkeb goyare goyen po diliŋ naŋkenenŋbe Yesu kuŋ hinhin beleŋ go po gama iryiŋ.

Yesu Al Kurunyen ya balem bana hurkuriŋ

11 ¹Be, Yesuya komatmiŋ yagoya gobe Yerusalem binde binde hamiŋ. Irdeb Betfage taundeya Betani taundeya gor kwamiŋ. Taun irawa gobe Olip dugu dabayiŋde gor haryen. Be, Yesu beleŋ taun kura hinhide gor matbe komatmiŋ irawa kura hulyaŋ yirdeb gaha yinyiŋ: ²“Taun iroyenter iro kuri. Kuŋbe doŋki foŋeŋ kura al go hende ma kuŋ hitiŋ goyen feŋde hike kiniryen. Keneŋbe hol irde teŋ wayiryen. ³Al kura beleŋ, ‘Gob daha teŋ har?’ dinkeb, ‘Doyaŋ Al Kurun beleŋ gake yihi. Niŋgeb heŋ ga moŋ tumulgaŋ tiyyen,’ iniryen,” yinyiŋ.

⁴Niŋgeb kuŋbe Yesu beleŋ yinyiŋ gwahade po doŋki goyen ya siŋakde feŋ titiŋ kenaryum. ⁵Irde kuŋ hol irde hikeb al gor hinhan goreb, “Daha irye yeŋ doŋki go hol irde har?” yinamiŋ. ⁶Irkeb Yesu beleŋ yinyiŋ gwahade po wol hekeb yubul tike teŋ kwaryum.

⁷Be, doŋki go Yesu hitte tawaŋbe uliŋhormiŋ yugu teŋ doŋki go hende ugamkeb go hende hurkuŋ keperde kuriŋ. ⁸Kuŋ hikeb al budam Yesu go palap irniŋ yeŋ uliŋhormiŋ yugu teŋ beleŋyaŋ ugamamiŋ. Irkeb al kurabe Yesu turuŋ irniŋ yeŋ beleŋ umŋa ird ird niŋ patila yuwalŋeŋ walde yawayamiŋ goyen beleŋyaŋ sar irde tukamiŋ. ⁹Al kurab meheŋ hekeb kurab kame heŋbe tumŋaŋ ala deŋem isaŋ heŋ gaha yamiŋ:

“Hosanna!¹

Doyaŋ Al Kurunyen deŋemde waŋ hi al gobe Al Kurun beleŋ guram irde tareŋ iryen!

¹⁰Asininiŋ Dewit beleŋ alya bereyamiŋ doyaŋ yirde hinhin gwahade yara yeŋ beleŋ doyaŋ diryen gobe Al Kurun beleŋ guram irde saŋiŋ iryen.

Hosanna! Al Kurun, tareŋge kurun wor po!” yamiŋ.

¹¹Be, Yesu go Yerusalem forok yeŋbe Al Kurunyen ya balem bana hurkuriŋ. Irdeb dawet kurun bana goyen yeneŋ tukuriŋ. Gega naŋa hubu hiriŋ geb, komatmiŋ 12ya Betani kwamiŋ.

Yesu Al Kurunyen ya balem bana hurkuŋ ya haraŋ hiriŋ (Mat 21:18-19)

¹²Be, fay urkeb Betani tubul teŋ heŋyabe Yesu go biŋge iryiŋ. ¹³Irkeb fik he yuwalŋeŋ digula urtiŋ goyen keneŋbe igineŋ miŋyaŋ daw yeŋ kuŋ

¹ 11:9 Hosanna gote miŋbe ‘Al Kurun, ge po turuŋ girde hitek!’

kinyiņ. Kuņ miņde mat nanĳkinyiņ gega, igineiņ miņmoņ, yuwalĳeņ beleņ po aw urtiņ kinyiņ. Fik ferd ferd nalu moņ geb, igineiņ miņmoņ kinyiņ. ¹⁴Gwahade keneņbe Yesu beleņ he goyen, “Al kura igineiņge sopte ma niyyeņ,” ineņ karan uryiņ. Irkeb mere tiyyiņ goyen komatmiņ yago beleņ nuramiņ.

¹⁵Be, kuņ Yerusalem forok yeņbe Yesube Al Kuruņyen ya balem koya beleņ po milgu irtiņ bana goņ hurkuņ al buda kuruņ gor det damu teņ hinhan goyen kwep kwep yirde yakira tiyyiņ. Irde hora kapyaņ heņ heņ marte^m gasuņ yad yaboloņ teņ nu damu teņ hinhan marte keperd keperd gasuņ manaņ yad yaboloņ teņ yunyiņ. ¹⁶Irdeb, “Damu teņ teņde niņ dawet ya balem diliņyaņ goyaņ gore sopte yukyawaņ ma yirnayiņ,” yinyiņ. ¹⁷Irdeb saba yirde heņyabe, “Al Kuruņyen asaņdebe, ‘Nere yabe megen niņ al buda kuruņ gayen gare waņ gabu irde mere nird nird ya hiyyeņ,’ yitiņ goyen ma nurde haņyen? Gega deņbe ya gayen teņ kawe marte bana kuņ kuņ gasuņ irde haņ,” yinyiņ. ¹⁸Gwaha yinkeb al buda kuruņ gor gabu iramiņ mar gore meremiņ go nurde dinōņ kok yamiņ. Niņgeb goke Al Kuruņ doloņ ird ird mata doyaņ marte karkuwaņmiņya pris buda gote karkuwaņmiņya Moseyen saba maryabe kafura heņbe, “Daha mat kura mayteke kamyeņ?” yeņ beleņ niņ nanĳkeneņ hinhan. ¹⁹Be, wawuņ hekeb Yesuya komatmiņya gobe taun kuruņ go tubul teņ mulgaņ heņbe hinhande gor kwamiņ.

Fik he torok yiriņ

(Mat 21:20-22)

²⁰Be, wampot Yerusalem mulgaņ heņ kuņ heņyabe fik he goyen filgiņiņde mat po torok yitiņ kenamiņ. ²¹Keneņbe Pita gobe biņ bak yekeb, “Tisa, fik he karan uraņ gob torok yiyuņ iro kena,” inyiņ. ²²Gwaha inkeb Yesu beleņ wol heņbe, “Dufaytiņbe Al Kuruņ niņ po tareņ irnayiņ. ²³Fuđinde wor po dineiņ hime. Al kura dugu gayen, ‘Kuņ makaņ alare kata!’ ineņ biņde dufay budam ma iryeņ. Irdeb dufaymiņde, ‘Mere tihim gabe forok yeņ nunyeņ,’ yeņ nuryeņ gobe gwahade po forok yeņ unyeņ. ²⁴Gwahade niņgeb gago dinhem. Det kuraņ Al Kuruņ gusuņaņ irnayiņ gob dufaytiņdebe tihit wor po yeņ nurnayiņ. Irkeb dende hiyyeņ. ²⁵⁻²⁶Niņgeb Al Kuruņ mere irde heņya kadtiņ beleņ buluņ dirtiņ goyen bitiņ bak yekeb goyare po halde yuneņ hinayiņ. Irke gab Adotiņ sanĳmiņ kuruņ wor po goreb dende wor halde dunyeņ,” yinyiņ.”

^m **11:15** Hora kapyaņ heņ heņ marbe Roma gabmanyen horaya Yuda marte horaya goyen al beleņ yeņ yunke Al Kuruņyen ya balemde niņ hora teņ wolmiņeņ al go yunke gab Al Kuruņ galak yirde haņyen. **11:25-26** Asaņ hoyaņdebe gahade hi: ²⁶ *deņ beleņ kadtiņ buluņ dirtiņ goyen ma halde yuneņ bitiņ bana po yerde hinayiņbe Adotiņ tareņmiņ kuruņ wor po goreb mata buluņtiņ goyen ma halde dunyeņ.*

Yesu tareņmiņ ge gusuņaj iramiņ

(Mat 21:23-27; Luk 20:1-8)

²⁷Be, Yesuya komatmiņya goyen sopte kuņ Jerusalem forok yamiņ. Irdeb Yesu go Al Kuruņyen ya balem goyen koya milgu irtiņ bana hurkuņ kuņ waņ teņ hikeb pris buda gote karkuwaņmiņya Moseyen saba marya Yuda marte doyaņ mar parguwakya beleņ yeņ hitte wayamiņ. ²⁸Irdeb Yesu gusuņaj irdeb, “Mata teņ ha gayenbe ganuņyen deņemde teņ ha? Ganuņ beleņ gwaha teņ hayiņ ginkeb gago teņ ha?” inamiņ. ²⁹Irkeb Yesu beleņ wol heņbe, “Ne wor gusuņaj uņkureņ kura direņ tihim goyen wol henaj ko. Irke gab al goyen deņemde mata teņ hime yeņ momoņ direņ. ³⁰Yon Baptais beleņ al baptais yirde hinhin goyenbe Al Kuruņyen deņemde ma alyen deņemde? Momoņ nirnaņ!” yinyiņ. ³¹Irkeb mel go yingē uliņ mere sege irdeb, “Al Kuruņyen deņemde intek gob, ‘Munaņ daniņ geb sabamiņ goyen usi yeņ nurde gama ma irde hinhan?’ dinyeņ,” yamiņ. ³²Munaņ alyen deņemde yetek gobe al buda kuruņ gob Yon Baptaisbe Al Kuruņyen mere basaņ al fudinde wor po yeņ nurde hinhan geb, goke kafura hamiņ. ³³Niņgeb mel goreb, “Neņbe go ma nurde hite,” inamiņ. Irkeb Yesu beleņ, “Ne wor mata teņ hime gayen al gote deņemde teņ hime ma dineņ,” yinyiņ.

Yuda mar beleņ Yesu mayke kamyeņ gote maya mere

(Mat 21:33-46; Luk 20:9-19)

12 ¹Be, gwaha teņbe Yesu beleņ Al Kuruņ doloņ ird ird mata doyaņ marte karkuwaņmiņya Moseyen saba marya Yuda marte doyaņ mar parguwakya goyen maya mere mat gaha yinyiņ: “Al kura wain meteņ harde koya kerde milgu iryiņ. Irdeb wain fimiņ gilyaņ heņ heņ niņ mete talde det gitik iryiņ. Irdeb wain meteņ go doyaņ ird ird ya yok manaņ iryiņ. Irdeb meteņ gobe meteņ mar hoyaņ haniņde kerdeb naņa gisaw kuriņ. ²Be, wain fiņ heke yad yad nalureb meteņ miņ al gore almiņ kura hulyaņ irke meteņ doyaņ irde hinhan mar hitte wayyiņ. Waņbe, ‘Wain kura nunke yad kwe,’ yinyiņ. ³Gega mel goreb al goyen mayde mayde takira tike duliņ kuriņ. ⁴Gwaha irkeb meteņ almiņ hoyaņ wor teņ kerke wayyiņ. Irkeb al gobe tonaņde mayde nanyaņ irde buluņ buluņ irde takira tiyamiņ. ⁵Be, sopte po al hoyaņ hulyaņ iryiņ. Gega al gobe mayke kamyiņ. Irkeb meteņ miņ al beleņ sopte al yad yerke waņ hinhan po goyenbe kurabe gasa yirde yakira teņ hinhan. Munaņ kurabe gasa yirke kamde hinhan. Meteņ marmiņ tumņaņ buluņ buluņ yirde hinhan. ⁶Be, go po tike kuņ kuņ funaņbe, ‘Urne gab palap irnayiņ,’ yeņbe urmiņ bubulkuņne wor po yeņ nurde uneņ hiyen al goyen teņ kerke wayyiņ. ⁷Gega wain meteņ doyaņ irde hinhan mar gobe kadom momoņ gird teņbe, ‘Meteņ gate miņ alyen urmiņbe gago niņgeb, wake mayteke kami.

Gogab meterŋ gate miŋ al miŋmoŋ hekeb neŋ beleŋ po tetek,' yamiŋ.
 8 Irdeb meterŋ miŋ al gote urmiŋ goyen mayke kamkeb tukuŋ meterŋ siŋjare gor temeyamiŋ.

9 "Gwaha tikeb meterŋ gote miŋ al beleŋ waŋbe daha yiryen yeŋ nurde haŋ? Gobe waŋ gasa yirke kamnayıŋ. Irdeb meterŋ go teŋ al hoyan haniŋde kiryen. 10 Mere ga dinhem gate miŋ goke Al Kurunyen asaŋde katiŋ goyen kapyan ma heŋ haŋyen? Mere gobe gahade:

'Ya yird yird mar beleŋ igiŋ moŋ yeŋ nurde pel iramiŋ hora goyen al hoyan beleŋ teŋ go hende ya saŋiŋ wor po iryiŋ.

11 Go iryiŋ gobe Doyaŋ Al Kurun beleŋ iryiŋ.

Dilniniŋdebe keneŋmiŋ kusamuŋ wor po,' yitiŋ hi," yinyiŋ.

Tikiŋ 118:22-23

12 Gwaha yinkeb mel goreb, "Siraw mere gabe neŋ ga po diniŋ hi," yeŋ nuramiŋ geb, goke igiŋ ma nurdeb daha mat kura teŋ fere tiniŋ yeŋ beleŋ niŋ nankenamiŋ. Gega mel gobe al buda kuruŋ goke kafura heŋbe tubul teŋ kwamiŋ.

Yesu tuŋaŋ urniŋ yeŋ teks yad yad mata niŋ gusuŋaŋ iramiŋ

(Mat 22:15-22; Luk 20:20-26)

13 Be, go kamereb Al Kurun doloŋ ird ird mata doyaŋ marte karkuwaŋmiŋya Moseyen saba marya Yuda marte doyaŋ mar parguwakya goreb Yesu goyen meremde kura soŋ heke tenayiŋ yeŋbe Herotyen alyabe Farisi mar kuraya hulyaŋ yirke Yesu hitte kwamiŋ.

14 Kuŋbe, "Tisa, gebe mere fudinde po teŋ hayen. Irde al kura al deŋem yaŋ ma deŋem moŋ goke ma nurde hayen geb, al niŋ kafura ma heŋ hayen. Irdeb fudinde mat po Al Kurunyen mere tagalde hayen. Niŋgeb gusuŋaŋ kura girtek. Moseyen saba gama irde hite mar gare Roma gabmanyen doyaŋ al kuruŋ Sisar niŋ teks kertek gobe igiŋ ma dahade? Untek ma, goŋmiŋ?" inamiŋ. 15 Gega Yesu go usi matamiŋ goyen yeneŋ bebak teŋbe, "Daniŋ lomlom nirde haŋ? Hora kura tawaŋ nunke kene," yinyiŋ. 16 Gwaha yinkeb hora mulowom unkuŋreŋ tawayamiŋ. Tawakeb, "Gabe ganuŋde toneŋya deŋemya har?" yineŋ gusuŋaŋ yiryiŋ. Irkeb wol heŋbe, "Roma gabmanyen doyaŋ al kuruŋ Sisaryen," inamiŋ. 17 Irkeb Yesu beleŋ, "Dawet kura Roma gabmanyen keneŋbe Roma gabman po uneŋ hinayiŋ. Gwahade goyen po, Al Kurunyenbe Al Kurun po uneŋ hinayiŋ," yinyiŋ. Irkeb mere go nurdeb dinonŋ kok yamiŋ.

Sadusi mar beleŋ al kamtiŋ huward huward niŋ Yesu gusuŋaŋ iramiŋ

(Mat 22:23-33; Luk 20:27-40)

18 Be, go kamereb Sadusi mar beleŋ Yesu hitte wayamiŋ. Go mar gobe al kamtiŋbe epte ma huwarnayiŋ yeŋ haŋyen. Be, mel goreb, 19 "Tisa, Mose beleŋ asaŋde gahade kayyiŋ: 'Al kura diriŋ miŋmoŋ heŋya berem

tubul teŋ kamkeb kuliŋ kura hiyeŋ goreb itiŋde beretap goyen teŋbe itiŋ ge diriŋ forok irde unyeŋ, yitiŋ hi. ²⁰Be, kamay itiŋya mel 7 kura hinhan. Itiŋ kuruŋbe berem yaŋ gega, diriŋ miŋmoŋ heŋya kamyiŋ. ²¹Irkeb kuliŋ beleŋ beretap go tiriŋ. Gega yeŋ wor diriŋ miŋmoŋ heŋya kamyiŋ. Yende kuliŋ wor gwahade po kamyiŋ. ²²Be, gwahade po kuŋ kuŋ kuliŋ funaŋ ge wor beretap go tiriŋ goyen diriŋ kura forok ma irdeya kamyiŋ. Funaŋbe bere goyen wor kamyiŋ. ²³Be, ire itiŋya mel gote berembe uŋkureŋ gogo po hinhin geb, kame al kamtiŋ huward huward nalurebe bere gobe ganuŋde berem hiyyeŋ?” inamiŋ.

²⁴Gwaha inkeb Yesu beleŋ wol heŋbe, “Deŋbe Al Kuruŋyen tareŋya merem asaŋde katiŋya goyen keneŋ wuk ma yeŋ haŋyen. Gwahade geb soŋ heŋ haŋ goyen go ma keneŋ haŋ? ²⁵Al kamtiŋ huwarnayiŋ nalurebe al beleŋ bere yade bere beleŋ al kuŋ kuŋ mata go miŋmoŋ hiyyeŋ. Yeŋbe Al Kuruŋyen gasuŋde hurkuŋbe yende miyoŋ yara henayiŋ. ²⁶Al kamtiŋ huward huward matabe Moseyen asaŋde kapyan ma heŋ haŋyen? Al Kuruŋ beleŋ he gergeŋ melak heŋ hinhin bana gore mat Mose mere irde, ‘Nebe Abraham, Aisakya Yekopyat Al Kuruŋ,’ inyiŋ gobe ma kapyan heŋ haŋyen? Mel gobe kamamiŋ gega, toneŋbe yeŋya haŋ geb, gogo gwahade yiriŋ. ²⁷Niŋgeb Al Kuruŋbe al kamtiŋde Al Kuruŋ moŋ, diliŋ gergeŋ haŋ mar gote Al Kuruŋ. Deŋ gab soŋ wor po heŋ haŋ,” yinyiŋ.

Moseyen saba gote miŋ wor pobe da?

(Mat 22:34-40; 23:1-36; Luk 10:25-28)

²⁸Be, goyenterbe Moseyen saba al kura gor heŋbe mel gore buluŋ mat Yesu gusuŋaŋ iramiŋ goyen Yesu beleŋ wol heŋ yuneŋ hike palŋa irde hinhin. Irdeb Yesu beleŋ meremiŋ keŋkela po wol heŋ yuneŋ hike nurdeb yeŋ wor, “Saba budam kuruŋ nurde hite gote miŋ wor pobe damiŋ?” ineŋ gusuŋaŋ iryiŋ. ²⁹Irkeb Yesu beleŋ wol heŋbe, “Saba miŋ wor pobe gahade. Deŋ Israel mar nurnaŋ ko. Doyaŋ Al Kuruŋniniŋbe Al Kuruŋ yeŋ uŋkureŋ po hi. ³⁰Niŋgeb bubulkuŋtiŋde mat, bitiŋde mat, irde dufaytiŋde mat wor po Al Kuruŋ niŋ amaŋeŋ nurde uneŋ hinayiŋ. Tareŋtiŋ manaŋ tumŋaŋ gabu irde yeŋ ge amaŋeŋ nurd uneŋ hinayiŋ. ³¹Saba gote kurhanbe al kadtiŋ goyen dindigeŋ ge amaŋeŋ nurde haŋyen gwahade goyen po nurde yuneŋ hinayiŋ. Saba hoyan kura iraw gayen fole yirtiŋ ma haŋ,” inyiŋ. ³²Gwaha inke al goreb, “Tisa, Al Kuruŋbe yeŋ uŋkureŋ gog po, hoyan miŋmoŋ yaha gobe fudinde wor po yaha. ³³Bubulkuŋtiŋde mat, bitiŋde mat, irde dufaytiŋde mat wor po Al Kuruŋ niŋ amaŋeŋ nurde uneŋ hinayiŋ. Tareŋtiŋ manaŋ tumŋaŋ gabu irde yeŋ ge amaŋeŋ nurd uneŋ hinayiŋ, irde dindikeŋ ge amaŋeŋ nurde haŋyen gwahade goyen po kadtiŋ ge bubulkuŋtiŋde mat amaŋeŋ nurd yuneŋ hinayiŋ gobe Al Kuruŋ diliŋde galak mataya dapŋa kumga teŋ kasor ird ird mataya goyen fole wor po yirde hi,” inyiŋ. ³⁴Be, al gore Yesuyen mere goyen keŋkela wol

hekeb, “Gebe Al Kurunya awalik hetek binde wor po haha,” inyiñ. Gwaha inkeb gor hinhan mar beleñ gusunaj ird ird niñ kama hamin.

Yesu beleñ Farisi marte sikken tagalyiñ

(Mat 22:41-46; Luk 20:41-47)

³⁵ Be, Yesube Al Kurunyen ya balem koya beleñ po milgu irtiñ bana goñ al saba yirde hinhin. Saba yirde heñyabe gaha yinyiñ: “Dahade ningeb Moseyen saba mar beleñbe Mesaiabe Dewityen foñeñ yeñ hanjen?”

³⁶ Dewit yinjenbe Holi Spirit beleñ ketal urke mere tiyyiñbe gahade:

‘Al Kurun beleñbe Doyan Al Kurunne gaha inyiñ:

“Wañ ketalner heñ al deñem yan wor po hawayiñ.

Irkeb asogo girde hañ mar goyen bul yirde yawamekeb gasa yirde yufurka tiyayiñ,” inyiñ, yitiñ hi. *Tikiñ 110:1*

³⁷ Dewit yiriñ gwahade po Mesaia goyen Doyan Alne inyiñ. Gega dahade ningeb, Moseyen saba mar beleñ bul mat Mesaia gobe Dewityen foñeñ yeñ hanjen? Gobe kukuwamneñ wor po,” yinyiñ. Irkeb al buda kurun gore mere go nurdeb amañeñ nuramiñ.

³⁸ Be, saba yirde heñyabe gaha yinyiñ: “Moseyen saba mar niñbe keñkela po heñ ga hinayiñ. Yeñbe al beleñ deney palap dirnañ yeñbe uliñhormiñ sombornen yerde al diliñyan wilwul teñ hanjen. ³⁹ Irdeb Yuda marte gabu ya bana dula nalu karkuwanan kuñ heñbe al deñem yan de gasunyan po keperde hanjen. ⁴⁰ Irdeb beretapyen samun komkom heñ hanjen. Gega al beleñ turun dirnañ yeñ Al Kurun mere irhet yeñbe mere ulyan wor po tulun teñ hanjen. Al gwaha teñ hinayiñ mar gobe gote murun gem bulun kurun wor po tenayiñ,” yinyiñ.

Beretap beleñ Al Kurun galak iryiñ gote mere

(Luk 21:1-4)

⁴¹ Irdeb Yesube Al Kurunyen ya balem bana goñ Al Kurun niñ hora yerd yerd gasun goyen siña kurhan keperdeb alya bereya hora yawan yerde hike yeneñ hinhin. Yeneñ hikeya al samun minyan mar budam hora karkuwan yawan yerde hinhan. ⁴² Gega beretap kura wanbe hora mulowom irawa yiryiñ. ⁴³ Irkeb Yesu beleñ komatmiñ yago tumnan hoy yirdeb, “Fudinde wor po dineñ hime. Beretap buniñeñ garebe al budam gor hora yerhañ mar goyen fole yirde hora kurun po kera. ⁴⁴ Samun minyan marbe samunmiñ yufut yuneñ hora yerhañ. Munan bere gabe siksukneñ ningeb, horamiñ basiña irtek yara gega tumnan yawan yera,” yinyiñ.

Nalu funande niñ mata

(Mat 24:1-35; Luk 21:5-33)

13 ¹ Be, Yesu go Al Kurunyen ya balem goyen tubul teñ kuñ heñya komatmiñ unkuñeñ kura beleñ, “Tisa, hora karkuwan ga yena. Ya

gabe tanarde tubul wor po titiņ,” inyiņ. ²Irkeb Yesu beleņ wol heņbe, “Ya kuruņ hora beleņ irtiņ keneņ haņ gayen kamebe hora uņkureņ muņ kura kadom hende ma hiyeņ. Tumņaņ gilgalaņ irde kateņ pasi henayiņ,” inyiņ.

³Be, Yesu go hurkuņ Olip doņdoņde keperde ya balem goyen keneņ hikeyabe Pita, Yems, Yonya Andruya po waņbe, ⁴“Daha naņabe mere dirha go forok yenayiņ? Irde da mata keneņbe go dinha goyen bebak titek?” ineņ gusuņaņ iramiņ. ⁵Irkeb Yesu beleņ wol heņbe, “Keņkela heņ ga hinaņ ko. Moņgo al usi dirnayiņ geb. ⁶Al budam nere mere teņ wayhet yeņ, ‘Nebe Mesaia,’ dineņ usi dirnayiņ. ⁷Goyenterbe fuleņa forok yeņ hinayiņ. Goyenbe fuleņa forok yeņ yeņ mere momoņ nurde goke hurkuņkat ma teņ hinayiņ. Fuleņa mata gobe forok yeņ hinayiņ gega, nalu funaņbe kame wor po ga wayyeņ. ⁸Fudinde, al miņ kura beleņ huwarde al miņ hoyaņ kuraya arde hinayiņ. Gabman kura beleņ gabman hoyanya fuleņa teņ hinayiņ. Niniņa karkuwaņ naņa kurar kurar forok yeņ hinayiņ. Biņge kamde kamde nalu forok yeņ hinayiņ. Kanduk kuruņ gobe bere beleņ haņkapyā diriņ kawaņ kere yeņ uliņ misiņ katyeņ go gwahade goyen po, kanduk go wa forok yeke gab nalu funaņ forok yiyyeņ.

⁹“Niņgeb keņkela po heņ ga hinayiņ. Ne niņ teņbe asogotiņ beleņ Yuda marte gabu yayaņ dukukeb doyaņ mar beleņ dusulak teņ hinayiņ. Irdeb merem yaņ dird dird niņ tiyuņde niņ doyaņ maryā gabman doyaņ mar karkuwaņa diliņde dukukeb gor huwarde ne niņ momoņ yirnayiņ. ¹⁰Mere igiņ ne niņ yitiņ gobe megeņ kuruņ gayen tagalde tukuke nurde pasi heke gab nalu funaņ forok yiyyeņ. ¹¹Niņgeb al kura dukuņ merere derke goya daha yeweņ yeņ goke kandukneņ ma nurde hinayiņ. Mere teņ teņ albe Holi Spirit, deņ moņ. Niņgeb yeņ beleņ mere dunkeb go po yeņ hinayiņ.

¹²“Goyenter mata kurabe ire itiņa yingeņ uliņ kadom al hay heņ guneņ tike al beleņ waņ gasa yirke kamnayiņ. Naniņ beleņ diriņmiņ wor gwahade po yiryeņ. Diriņ manaņ naniņ miliņ kakņa yirde al hoyaņ yinke waņ gasa yirke kamnayiņ. ¹³Ne niņ nurkeb al budam beleņ haram dirnayiņ. Gega al kura tareņ heņ kanduk go fole yiryeņbe Al Kuruņ beleņ tumulgaņ tiyyeņ.

¹⁴“(Ge, asaņ gayen ga kapyā heņ ha albe keņkela bebak tiyayiņ.) Al Kuruņyen ya balemde mata kukuwam kura gor forok yetek moņ gega, forok yeke keneņbe deņ Yudia naņare hinayiņ marbe busaharde dugure hurkuņ bana kunayiņ. ¹⁵Goyenterbe al kura ya hende hiyeņ goyen kateņ yamiņ bana hurkuņ detne kura yade ga busahare ma yiyyeņ. ¹⁶Al kura meteņmiņ tubul teņ yare kuņ amilne teņ ga ma yiyyeņ. ¹⁷Goyen nalurebe bere biņ miņyanya bere diriņ besare niņ miņyanyabe meteņeņ wor po yiryeņ. ¹⁸Niņgeb goke Al Kuruņ gusuņaņ irde hinayiņ. Moņgo kanduk kuruņ goyen nalu buluņde forok yiyyeņkek geb. ¹⁹Goyen nalureb megeņ

gabe kanduk kuruj wor po tiyyej. Haŋkapy Al Kuruj beleŋ megeŋ iryij waŋ waŋ ga hitere irde kame wor kanduk gwahade kura ma kentek. Go kanduk gobe baraŋ wor po duryej. ²⁰Niŋgeb Al Kuruj beleŋ nalu buluŋ goyen ulyaŋde po tubul tike manhan al tumŋaŋ kamwoŋ. Gega al nere yirij goke teŋbe nalu goyen wer irdeb dolfon iryij. ²¹Goyen nalure al kura beleŋ Mesaia niŋ yeŋ iŋgog gag dirkeb goyen nurde gama ma yirnayij. ²²Mesaia falkukya Al Kurujyen mere basaŋ mar falkukya beleŋ waŋbe alya bereya Al Kuruj beleŋ basaŋ yirtij goyen daha mat kura usi yirteke katnaŋ yeŋ mata tiŋej turuj yaŋ kurayen kurayen forok yirnayij. ²³Niŋgeb keŋkela heŋ ga hinayij. Merebe nalu go forok ma yeŋ hikeya pet teŋ gago momoŋ dirde hime geb.

²⁴“Niŋgeb kanduk kuruj goyen kamereb,
‘Naŋa kidoma hiyyej, irdeb gagasi ma timiyyej.

²⁵Naŋkiŋde mat dinambe suk yeŋ katnayij.

Irdeb naŋkiŋde niŋ dawet kuruj goyen aŋgor iryeŋ.’ *Aisaia 13:10; 34:4*
²⁶Irde go nalureb al tumŋaŋ ne Al Urmiŋ gayen saŋiŋne turuj yaŋ wor po kigariŋkiŋ faykek hende katmeke nennayij. ²⁷Irdeb miyoŋne yad yermeke kuŋ megeŋ muruj kurhan mat kuŋ megeŋ muruj kurhan niŋ alya bereya niŋgeŋ ge basaŋ yirtij goyen yawaŋ gabu yirde nunnayij.

²⁸“Niŋgeb fik he ga keneŋ gor mat dufay tenaŋ. He haniŋ goyen beda urde yuwalŋej gergeŋ forok yekeb beda naŋa heweŋ tiya yeŋ nurde haŋyen. ²⁹Niŋgeb gwahade goyen po, kame mata gayen forok yeke yeneŋbe nalu funaŋbe binde wor po hihi yeŋ nurnayij. ³⁰Fuŋde wor po dineŋ hime. Alya bereya gayen nalure haŋ gayen ma kamkeya mata kuruj gayen forok yiyyej,” yinyij. ³¹Megeŋya naŋkiŋyabe hubu hiriryej. Gega merenebe hubu ma hiyyej.

Nalu funaŋbe bebakkeŋ moŋ

(*Mat 24:36-44*)

³²Be, Yesu go sopte gaha yinyij: “Al kura nalu goyen bebakkeŋ ma nurde hi. Hubu wor po. Naniŋ po ga nurde hi. Urmiŋya miyoŋmiŋ yiŋgeŋya haŋ goyen wor ma nurde haŋ. ³³Nalu goyenter dawet go wayyeŋ yeŋ ma nurde haŋ niŋgeb, keŋkela heŋ doyaŋ heŋ hinayij. ³⁴Gobe ya miŋ al kura naŋa gisaw kwe yeŋ meteŋ marmiŋ haniŋde meteŋ kurayen kurayen yuneŋbe ya doyaŋ al goyen, ‘Ne waŋ waŋ nalu niŋ dufay heŋ keŋkela doyaŋ heŋ hayij,’ inej kuyeŋ go gwahade goyen. ³⁵Niŋgeb ya gote miŋ al mulgaŋ heŋ heŋ nalu ma nurde haŋ geb, keŋkela heŋ ga hinayij. Wawuŋbana daw, wawuŋ binde daw tatirok mere ma tiyyeŋya daw ma biram kerkeya yara kura wayyeŋ gobe ma nurde haŋ. ³⁶Moŋgo ferde ug heŋ hikeya waŋ bemel diryeŋ geb. ³⁷Mere ga dineŋ hime gabe deŋ po ma dineŋ hime. Al tumŋaŋ yineŋ hime. Niŋgeb keŋkela heŋ ga hinayij,” yinyij.

Yesu mayde mayde niŋ sege irde hinhan

(Mat 26:1-5; Luk 22:1-2; Yon 11:45-53)

14 ¹Be, Yuda marte asem yago beleŋ Isip naŋa tubul tiyamiŋ goke biŋ bak yeŋ yeŋ ge gabu ird ird nalu kuruŋ Pasoba^o ineŋ hanŋyen goya beret yis miŋmoŋ nen nen nalu kuruŋ goya goyen molye go yeŋ heŋya pris buda gote karkuwaŋmiŋya Moseyen saba marya beleŋ daha mat kura al diliŋ banare Yesu teŋ mayteke kami yeŋ balmiŋ mere sege iramiŋ. ²Gega yiŋgeŋ mere mayde, “Dula nalu kuruŋ gayenter ma gwaha titek. Moŋgo al beleŋ fuleŋa dirnak ge,” yamiŋ.

Bere kura nat fimiŋ teŋ Yesu tonanđe wok iryiŋ

(Mat 26:6-13; Yon 12:1-8)

³Be, Yesu go Betani taunde Saimonyen yare heŋ biŋge nene hinhin. Saimon gobe bikkeŋ busuka miŋyaŋ hiyen goke teŋbe Saimon Busuka ineŋ hanŋyen. Biŋge nene hikeyabe bere kura beleŋ nat he filiniŋ gote fimiŋ hamiŋ igiŋ muŋ wor po yaliŋ alabasta hora po irtiŋ bana hitiŋ goyen tawaŋ migisuŋ mardeb Yesu tonanđe wok iryiŋ. Nat fimiŋ gobe damum hende wor po. ⁴Be, bere gore gwaha tikeb al gor hinhan gore go keneŋ biŋ ar yekeb, “Daniŋ dawet igiŋ muŋ gayen titmiŋeŋ buluŋ ira?” yeŋ yiŋgeŋ uliŋ tagalde hinhan. ⁵Tagalde heŋyabe, “Det goyen damumble al kura dama un̄kureŋde meten teŋ hora tiyyen gote folek. Niŋgeb hora go teŋbe al bunineŋ samuŋ miŋmoŋ faraŋ yurtek igiŋ gega, gwaha ma tiya,” yeŋ ineŋ teŋ buluŋ iramiŋ. ⁶Irkeb Yesu beleŋ, “Tubul tinaŋ. Daniŋ dufaymiŋ buluŋ irde haŋ? Yeŋbe mata igiŋ muŋ wor po nira. ⁷Al bunineŋ samuŋ miŋmoŋbe hugineŋ deŋya hikeb igiŋ faraŋ yurde hinayiŋ. Goyenpoga nebe deŋya hugineŋ ma hitek. ⁸Yeŋ beleŋ mata nirtekbe gag po nira. Nat fimiŋ sam nira gabe ne kammeke mete nirnayiŋ goke teŋ gago gitik nira. ⁹Niŋgeb fudinde wor po dineŋ hime. Ne niŋ naŋa kuruŋ gayen tagalde tukuŋ heŋbe bere gare mata tiya gake wor tagalde hike nurde hinayiŋ,” yiniŋ.

¹⁰Irkeb Yesuyen komat kura deŋembe Yudas Iskariot gore pris buda gote karkuwaŋmiŋ haniŋde pel ire yeŋ kuriŋ. ¹¹Kuŋ yenkeb yende mere goyen nurde amaŋ heŋbe horare damu girtek inamiŋ. Irkeb Yudas go daha mat kura Yesu goyen mel gote haniŋde kereŋ yeŋ dufay heŋ hinhin.

^o 14:1 Bikkeŋ Israel mar Isip naŋa tubul teŋ Kenan kuniŋ tiyamiŋyabe Al Kuruŋ beleŋ sipsip al diriŋ dirneŋ gasa yirde darim yade yame kantayaŋ sam yirnaŋiŋ yiniŋ. Munan al kura gwaha ma tiyamiŋ marbe Al Kuruŋyen miyoŋ beleŋ waŋbe mel gote urmiŋ mataliŋya dapŋamiŋ mataliŋya goyen tumŋaŋ gasa yirke kamamiŋ. Gega meremiŋ gama iramiŋ marbe miyoŋmiŋ beleŋ yubul tiyamiŋ goke dufay heŋ heŋ ge dula mata teŋ hinhan.

Yesuya komatmiŋya dula funaŋ tiyamiŋ
(*Mat 26:17-25; Luk 22:7-14,21-23; Yon 13:21-30*)

¹²Be, haŋka wawuŋbe beret yis miŋmoŋ nen nen nalu miŋ ureŋ tiya yeŋ nurdeb Yesuyen komatmiŋ yago beleŋ, “Damde kuŋ Pasoba nalure niŋ biŋge goyen gitik irniŋ?” yeŋ gusuŋaŋ iramiŋ. Go nalure goyenterbe Pasoba niŋ teŋ sipsip dirneŋ gasa yirde kumga teŋ haŋyen. ¹³Irkeb Yesu beleŋ komatmiŋ irawa kura hulyaŋ yirdeb, “Yerusalem kuŋbe al kura fe kuwe teŋ waŋ kuke keneŋbe gama iriryen. ¹⁴Ya binde hurkukeb gama irde hurkuŋ ya miŋ al goyen keneŋbe, “Tisa beleŋ, “Gasuŋ darebe neya komatneya Pasobayen biŋge netek?” yihi, iniryen. ¹⁵Gwaha inkeb ya bana goŋ gasuŋ kuruŋ kura hende hi, bikkeŋ sope irtiŋ goyen dikala diryen. Irkeb gasuŋde gorbe dula teŋ teŋ det goyen gitik iriryen,” yinyiŋ. ¹⁶Irkeb irem go Yerusalem kuŋbe yeŋ yinyiŋ gwahade po yenaryum. Irdeb Pasoba biŋge goyen gitik irdeb mulgaŋ haryum.

¹⁷Be, wawuŋbana hekeb Yesuya komatmiŋ 12ya goyen yare gor kuŋ forok yamiŋ. ¹⁸Irdeb ya biŋde goŋ hurkuŋ keperde dula teŋ hinhan. Dula teŋ heŋyabe Yesu beleŋ, “Fudinde wor po dinhem. Al uŋkureŋ kura tumŋaŋ dula teŋ hite bana gare po asogoner haniŋde niryen,” yinyiŋ. ¹⁹Irkeb komatmiŋ weŋ gor hinhan gobe kandukŋeŋ nuramiŋ. Irdeb yuŋkureŋ yuŋkureŋ waŋbe, “Ne niŋ daw yeŋ ha?” iney gusuŋaŋ irde hinhan. ²⁰Irkeb Yesu beleŋ wol heŋbe, “Gobe al neya tumŋaŋde beret teŋ fe koron uŋkureŋ bana fakamde hi al goreb gwaha tiyyen. ²¹Ne Al Urmiŋ gabe Al Kuruŋyen mere basaŋ al beleŋ bikkeŋ asaŋde kayamiŋ goyen po gama irdeb kameŋ. Goyenpoga ne Al Urmiŋ gayen asogoner haniŋde niryen al gobe kanduk kuruŋ wor po tiyyen. Al gobe kawaŋ ma hiriŋ manhan kanduk buluŋ goyen go ma kenwoŋ,” yinyiŋ.

²²Irdeb biŋge nene heŋyabe Yesu beleŋ beret teŋbe Naniŋ igiŋ nurd uneybe ubala teŋ komatmiŋ yunyiŋ. Yuneybe, “Beret dunhem gahade gayen po nebe deŋ ge teŋ kameŋ. Niŋgeb goke teŋbe beret gabe gasoŋne geb, teŋ nenaŋ,” yinyiŋ. ²³Irdeb wain fimiŋ gisu bana hitiŋ goyen teŋbe sopte po Al Kuruŋ igiŋ nurd uneybe, “Ga nenaŋ,” yineŋ yunkeb tumŋaŋ nitiŋ ala tiyamiŋ. ²⁴Irkeb Yesu beleŋ, “Al megen haŋ kuruŋ gake Al Kuruŋ beleŋ biŋa tareŋ tiyyiŋ goke teŋ darine wok irde kameŋ. Niŋgeb wain nahaŋ gobe darine. ²⁵Fudinde dineŋ hime. Wain fimiŋ gayen tebaŋ ma neweŋ. Kuŋ kuŋ Al Kuruŋ beleŋ alya bereyamiŋ doyaŋ yiryen goyenter gab denya tumŋaŋ sopte wain fimiŋ gergeŋ netek,” yinyiŋ.

²⁶Be, go kamereb tikiŋ hamiŋ. Irdeb Olip doŋdoŋde hurkamiŋ.

Pita beleŋ helwaŋ hiyyen goke tagalyiŋ
(*Mat 26:31-35; Luk 22:31-34; Yon 13:36-38*)

²⁷Be, hurkuŋ gor heŋbe Yesu beleŋ gaha yinyiŋ: “Deŋ tumŋaŋ nubil teŋ busaharnayiŋ. Mata gote merembe hakot asaŋdeb,

'Sipsip doyanj al go maymekeb sipsipbe burgagaw kernayinj,' katinj hi.

Sekaraia 13:7

²⁸Gega kamenj goyen sopte huwardeb ne wa mehej hej Galili kwej," yinyinj. ²⁹Irkeb Pita belej, "Al hoyanj gabe gubul tinayinj gega, nebe epte ma wor po gwaha tiyej," inyinj. ³⁰Irkeb Yesu belej, "Fudinde wor po ginerej hime. Hanjka wawuj tatirok irawa ma irkeya ge wa wawuj karwore ne nin helwanj hej, 'Al gobe ma nurd unej hime,' yawayinj," inyinj. ³¹Gega Pita belej, "Geya wor iginj kamyenj. Go ma wor po gubul tiyej," inej tarej po hirinj. Irkeb kadom yago mananj huwardeb tumnanj gwaha ala inaminj.

Yesu Getsemani hej Al Kuruj mere iryinj

(Mat 26:36-46; Luk 22:39-46)

³²Be, gor mat kuj nanja deje kura Getsemani inej hanjyende gor forok yejbe komatminj goyen, "Gar keperde doyanj nirde hike nebe Al Kuruj mere irej," yinyinj. ³³Irdeb Pita, Yems, Yonya po yadeb gasuj hoyande kwaminj. Goyareb Yesube dufayminja binjabe kanduk wor po hirinj. ³⁴Irkeb mel karwo goyen yinyinj. "Kanduk kuruj wor po mununa. Irkeb kamtek wor po nurhem. Nijgeb gar hej kejkela hej hinarj ko," yinyinj. ³⁵Gwaha yinenjbe gor mat muj kura singir tej kujbe megen katej dokolhoj yuguluj tejbe belej hoyanj kura hi kenem kanduk kuruj yej hitte forok yetek nalu goyen forok ma yewoj yej Al Kuruj mere iryinj. ³⁶"Ado, mata budam kuruj gabe delgerbe metenej kuram moj. Nijgeb belej hoyanj kura hi kenem kanduk gayen go ma tewej. Goyenbe nere dufay ma gama irayinj. Gigen dufay go po gama irayinj," inyinj. ³⁷Irdeb mulganj hej kuj komatminj karwo gobe firtinde hike yinyinj. Gwahade yenenjbe Pita goyen, "Saimon, bikkej ferha gago? Epte ma keperde muj kura doyanj hawayinj? ³⁸Arkup ma yo, irde Al Kuruj mere irde ga hayinj. Gogab Satan wanj lom girkeb go ma katayinj. Begerbe wilaknej nurde ha. Gega ulgebe kanduk hej hi," inyinj.

³⁹Irdeb sopte yubul tej kuj hanjkapya Al Kuruj mere iryinj gwahade po inyinj. ⁴⁰Be, mulganj hej wanjbe mel karwo goyen dukpu hika yirke sopte po firtinde hike yinyinj. Irkeb mel go huwardeb feraminj goke warga hejbe Yesu goyen gwaha mat kura mere irtek ma nuraminj.

⁴¹Gwahade yenenjbe mulganj hej Al Kuruj mere irde hinjin gasunde kurij. Irdeb funanj mel karwo go hitte wanjbe, "Huwarnanj! Ep ferde usanj hahanj nij. Ne Al Urminj gayen mata buluj mar hanjnde nertek nalube gago forok yihi. ⁴²Huwarke kuniinj. Asogoner hanjnde nertek albe gago bikkej waya geb," yinyinj.

Wanj Yesu tanaraminj

(Mat 26:47-56; Luk 22:47-53; Yon 18:3-12)

⁴³Gwaha yinenj hikeyab Yesuyen komatminj kura Yudasyabe Yesu tej tej marya goyen wayaminj. Fulejare nij bidilaya nukwaya yanarde

wayamiņ. Go mar gobe pris buda gote karkuwaņmiņya Moseyen saba marya irde Yuda marte doyaņ mar parguwakya beleņ hulyaņ yirkeb gogo wayamiņ. ⁴⁴Be, Yesu asogom haniņde kertek al goreb belen waņ heņya Yesu tetek mar goyen yinyiņ. “Kuņ forok yeņbe mata kura tiyeņ geb. Al kura amaņ amaņ irde uluņde u irmeke neneņbe gog po yeņ kuņ tenayiņ. Irdeb upsineņ po tanarde teņ kunayiņ,” yinyiņ. ⁴⁵Irdeb forok yeņ goyare po Yesu hitte waņbe, “Tisa,” ineņbe yende pere ird ird matare uluņde u iryiņ. ⁴⁶Irkeb al buda gore waņ tanaramiņ. ⁴⁷Gwaha tikeb Yesu komatmiņ kura yeņ binde hinhin goreb fuleņare niņ bidilamiņ mardeb pris buda gote kuruņmiņde meteņ al gote kirmiņ sapa iryiņ. ⁴⁸Irkeb Yesu beleņ yeņ tetek mar goyen, “Ne gayen fuleņa mar yad kuņ hime geb, gago fuleņare niņ bidilaya nukwaya manaņ waņ nawarniņ teņ haņ? ⁴⁹Nebe deņya hugineņ hinhet. Al Kuruņyen ya balem bana saba tagalde hinhem. Gega go ma nade hinhan. Goyenbe goņmiņ. Al Kuruņyen asaņde mere katiņ hi gwahade po forok yiyyeņ,” yinyiņ. ⁵⁰Irkeb komatmiņ yago tumņaņ Yesu tubul teņ busaharamiņ.

⁵¹⁻⁵²Goyenterbe al foņeņ kura amil faykek po aw teņ Yesu gama irde hinhin. Goyenbe yeņ manaņ mel gore tanarkeb amil goyen gor po afuyaņ heņbe kupsoņ busaharyiņ.

Yesube pris buda gote kuruņmiņ diliņde huwaryiņ
(*Mat 26:57-68; Luk 22:54-55,63-71; Yon 18:13-14,19-24*)

⁵³Be, Yesube pris buda gote kuruņmiņ Kaiafas hitte tukukeb pris buda gote karkuwaņmiņya, Yuda marte doyaņ mar parguwakya Moseyen saba marya tumņaņ gabu iramiņ. ⁵⁴Be, Pitabe Yesu gama irde kuriņ gega, gisaw yarham po hinhin. Irdeb pris buda gote kuruņmiņde ya kuruņ goyen milgu irtiņ koya bana goņ gabu gasuņde hurkuriņ. Irdeb gorbe ya goyen doyaņ irde hinhan marya tumņaņ kak kateņ hinhan. ⁵⁵Irkeb pris buda gote karkuwaņmiņya Yuda marte doyaņ mar tumņaņ goya gabu irde da misiņde kura Yesu mayteke kami yeņ mere sege iramiņ. Gega mere miņ igiņ kura ma kenamiņ. ⁵⁶Gorbe al budam Yesu merem yaņ irniņ yeņ usi mere fakaka iramiņ. Gega meremiņ kuruņ gobe soņ ala heke miņ keņkelak kura ma forok yiriņ. ⁵⁷Gwaha teņ kuņ kuņbe al kura beleņ huwardeb usi mere gahade tiyamiņ. ⁵⁸“Al gareb, ‘Al Kuruņyen ya balem al haniņde irtiņ gabe upew ureņ. Irdeb naņkahal karworeb hoyaņ ireņ. Goyenbe al haniņde irtiņ gahade moņ,’ yeke nurtiriņ,” yamiņ. ⁵⁹Gega merem goyen wor soņ ala heņ miņ keņkelak ma forok yiriņ.

⁶⁰Irkeb pris buda gote kuruņmiņ beleņ gor gabu iramiņ mar diliņ mar huwardeb, “Mere ulger irde haņ gayen kura muņ wol ma hawayiņ? Dahade nurde ha?” ineņ Yesu gusuņaņ iryiņ. ⁶¹Gega Yesu gobe haywaņ ma irde balmiņ po hinhin. Irkeb sopte po gusuņaņ irdeb, “Ge gayenbe

Mesaia, Al Kuruñ neñ beleñ doloñ irde hityen gote Urmiñ?” inyiñ. ⁶²Irkeb Yesu beleñ wol heñbe, “Gwaha, nebe ge yaha gog po. Niñgeb ne Al Urmiñ gayenbe al deñem yañ wor po heñ Al Kuruñ sañiñmiñ kuruñ wor po gote haniñ yase beleñ keperdeb kigariñkiñ faykek hende kateñ himeke nennayiñ,” inyiñ. ⁶³Gwaha inkeb pris buda gote kuruñmiñ goreb Al Kuruñ sukal ira yeñ biñ ar yeke uliñhormiñ erek irdeb, “Yiñgeñ gwaha yihi geb, daniñ merem yañ irtek al hoyañ niñ nurtek?” yiriñ. Irdeb al buda goyen, ⁶⁴“Al Kuruñ sukal ira gab dahade nurde hañ?” yineñ gusuñañ yiryiñ. Irkeb mel goreb biñde buluñ nurde Yesu goyen kamiñ wor po yamiñ. ⁶⁵Irkeb kura beleñ meyañ irde amil teñ diliñ mala teñ haniñ buda irde mayde heñyab, “Tagala. Ganuñ beleñ muguna?” inamiñ. Irdeb pris buda gote kuruñmiñde ya goyen doyañ irde hañyen mar beleñ tukunbe usulak tiyañiñ.

Pita beleñ Yesu niñ helwañ hiriñ

(Mat 26:69-75; Luk 22:56-62; Yon 18:15-18,25-27)

⁶⁶Be, Pitabe pris buda gote kuruñmiñde ya kuruñ koya beleñ po milgu irtiñ bana goñ al gabu irde hañyen sawsawa kuruñ kura goyenter hikeyabe pris buda gote kuruñmiñde meteñ bere kura wayyiñ. ⁶⁷Yeñbe kak kateñ hinhin. Gwaha teñ hikeya bere gore wañ keñkela irdeb, “Ge manañ Nasaret niñ al Yesuya hinhan,” inyiñ. ⁶⁸Goyenpoga Pita beleñ helwañ irdeb, “Gebe da niñ yeñ ha? Neb goke kura yeñ ha yeñ ma nurde hime,” ineyñbe gabu gasuñ go tubul teñ hoyañde kuriñ. ⁶⁹Be, bere goreb Pita sopte po keneñbe gor huwarde hinhan mar goyen, “Yesuyen kadom kurabe gago,” yinyiñ. ⁷⁰Irkeb tebañ po helwañ hiriñ.

Be, muñ kura hitneñ teñbe yeñ bindere hinhan mar goreb, “Fudinde, gebe Galili niñ al. Niñgeb kuramiñbe ge gago,” inamiñ. ⁷¹Irkeb huwardeb mere hitem po yirdeb, “Nebe Al Kuruñ beleñ neneñ hikeya fudinde wor po dineñ hime. Nebe al goke yeñ hañ yeñ ma nurde hime,” yinyiñ. ⁷²Irkeb goyare goyen po tatirok wawuñ irawa iryiñ. Irkeb Yesu beleñ, “Tatirok iraw ma irkeya ge wa wawuñ karwore ne niñ yeñ, ‘Al gob go ma nurd uneñ hime,’ yawayiñ,” inyiñ goyen goke biñ bak yiriñ. Irkeb mata tiyyiñ goke kandukneñ wor po nurde esen epte ma tiyyiñ.

Yesu Pailat diliñde huwaryiñ

(Mat 27:1-2,11-14; Luk 23:1-5; Yon 18:28-38)

15 ¹Be, wampot wor po pris buda gote karkuwañmiñya Moseyen saba marya Yuda marte doyañ mar parguwakya doyañ mar tumñañ wañ gabu irde mere sege irdeb, “Mayteke kami,” yamiñ. Irdeb Yesu haniñ fere teñ Pailat, Roma gabman beleñ teñ kerke Israel wayyiñ doyañ al goyen hitte tukamiñ. ²Irkeb Pailat beleñ huwardeb, “Yuda marte doyañ al kuruñ yeñ hañ gobe ge gago?” ineyñ gusuñañ iryiñ. Irkeb

Yesu beleŋ wol heŋbe, “Gwaha, gigeŋ yaha gog po,” inyiŋ. ³Be, pris buda gote karkuwaŋmiŋ beleŋ det budam niŋ Yesu goyen miŋge iramiŋ. ⁴Irkeb Pailat beleŋ, “Dahade niŋgeb mere ulger irde haŋ kuruŋ gayen kura muŋ ma wol heŋ ha?” ineŋ sopte gusuŋaŋ iryiŋ. ⁵Goyenbe go ma haywaŋ irke keneŋbe diliŋ fot yiriŋ.

⁶Be, Pasoba dula nalu kuruŋ gwahade goyenterbe Pailat beleŋ al koyare haŋyen goyen Yuda mar beleŋ po deŋe urkeb unjkureŋ kura teŋ siŋa irde hiyen. ⁷Goyare goyenbe al kura deŋem Barabasya kadom yagoyabe bikkeŋ Roma gabman asogo irde fuleŋa teŋ al gasa yirke kamkeb yade koyare yeramiŋ goyen hinhan. ⁸Be, nalu goyenter Pailat beleŋ mata teŋ hiyen go gwahade po diri yeŋ nurdeb Yuda mar goyen Pailat gusuŋaŋ irniŋ yeŋ wayamiŋ.

⁹⁻¹⁰Be, Pailatbe al budam pris buda gote karkuwaŋmiŋ yubul teŋ Yesu gama irkeb pris buda gote karkuwaŋmiŋ beleŋ keneŋ daniŋ neŋ ma gama dirhaŋ yeŋ nurdeb gogo Yesu niŋ igiŋ ma nurde yeŋ hitte tawayamiŋ goyen bikkeŋ yeneŋ bebak tiyyiŋ. Niŋgeb Pailat gore huwardeb, “Deŋbe Yuda marte doyaŋ al kuruŋ gayen tubul teŋ dunwoŋ yeŋ nurde haŋ?” yineŋ gusuŋaŋ yiryiŋ. ¹¹Gega pris buda gote karkuwaŋmiŋ beleŋ al buda kuruŋ goyen, “Barabas siŋa ira innayiŋ,” yeŋ biŋ yade tukamiŋ.

¹²Be, Pailat beleŋ huwardeb, “Be, gwaha yahaŋ geb, deŋ beleŋ Yuda marte doyaŋ al kuruŋ ineŋ haŋ al gayenbe daha ireŋ?” yineŋ gusuŋaŋ yiryiŋ. ¹³Irkeb al buda kuruŋ goreb hokde po, “Kuruse hende mayke kami! Kuruse hende mayke kami!” yamiŋ. ¹⁴Irkeb Pailat beleŋ sopte gusuŋaŋ yirdeb, “Da misiŋdeb gogo yahaŋ? Da mata buluŋ tiyuŋ?” yinyiŋ. Gega al buda kuruŋ gore mere nurtek ma hamiŋ. Irdeb hokde wor po, “Kuruse hende mayke kami! Kuruse hende mayke kami!” yeŋ tebaŋ tiyamiŋ. ¹⁵Irkeb Pailat beleŋ al buda kuruŋ goyen gwaha yirmeke biŋde igiŋ nurnaŋ yeŋbe Barabas teŋ siŋa irdeb Yesube teŋ fuleŋa marmiŋ haniŋde kiryiŋ. Irkeb tukuŋ usulak teŋbe kuruse hende mayniŋ yeŋ tukamiŋ.

Roma gabmanyen fuleŋa mar beleŋ Yesu giwgiw irde hinhan
(*Mat 27:27-31; Yon 19:2-3*)

¹⁶Be, go mar goreb Pailatyen ya kuruŋ goyen siŋa kurhan tukuŋbe fuleŋa mar pasi po hoy yirke waŋ gabu iramiŋ. ¹⁷Irdeb doyaŋ al kuruŋyen umŋa irhet yeŋ amil umŋam bukkeŋya digulakya suluk yirke bukkeŋ yara hitiŋ kura goyen tawaŋ Yesu hor irde uneŋbe doyaŋ al kuruŋyen tonaŋhor irhet yeŋbe kaŋ daŋdaŋeŋ yaŋ teŋ tiga ilde tawaŋ Yesu tonaŋde misiŋeŋ yaŋ po keramiŋ.

¹⁸Be, gwaha irdeya gab doyaŋ al kuruŋ turuŋ irde haŋyen gwahade irhet yeŋ giwgiw irdeb, “Gebe Yuda marte doyaŋ al kuruŋ. Amaŋeŋ nurde turuŋ girhet,” ineŋ bak mayde epte ma irde hinhan. ¹⁹Irdeb he

nukware tonanđe mayde teban irde meyan irde Yesu kahan minđe katen dokolhoŋ yuguluŋ teŋ doyaŋ al kuruŋ palap irde hanyen gwahade irtin yara irde hinhan.

²⁰Be, mel gobe gwaha mat Yesu go giwgiw irde amil umŋam bukkenya digulakya suluk yirke bukkeŋ yara hitin kura hor irde unamin goyen tugu teŋbe yende amil po sopte hor irde unamin. Irdeb tukuŋ kuruse hende maynin yeŋ teŋ sinjare kwamin.

Yesu kuruse hende mayamin

(*Mat 27:32-44; Luk 23:26-43; Yon 19:17-27*)

²¹Be, goyare goyenbe Sairini nin al kura deŋembe Saimon goyen tiyuŋ hoyanđe mat waŋ Yerusalem kuŋ hinhin. Irkeb fulenja mar beleŋ belen keneŋbe Yesu faraŋ urde kuruse tiwi yeŋ pakku iramin. Saimon gobe Aleksandaya Rufusyat nanin.

²²Be, mel gore Yesu goyen tukuŋ naŋa deŋe kura Golgota inen hanyende gor tukamin. (Golgota deŋe gote minbe ‘al tonan kinjiniŋde’.) ²³Gorbe ulin misiŋ falmuk ird irdde nin he fiminya wain fiminya suluk irtin goyen Yesu unamin. Gega go ma niriŋ. ²⁴Irkeb teŋ kuruse hende kerde kahanya haniŋya goyen heya karki yirde nil po teŋ yuramin. Irdeb amilmin yugu tiyamin goyen ganuŋ beleŋ yawaryen yeŋbe hora wet ma he parwek wet kura det kuldin irtin goyen teŋ yende matare tilin tanaramin.

²⁵Be, Yesube 9 kilok wampot kuruse hende mayamin. ²⁶Irdeb da misiŋde mayke kamyin goyen he parwek kura teŋ gahade kaŋbe kuruse tonanđe keramin:

YUDA MARTE DOYAŋ AL KURUŋ

²⁷⁻²⁸Be, go nature goyen po kawe mar irawa kura goyen wor kuruse hende gasa yiramin. Irdeb Yesuyen kurusebe kahalte kerdebe al irawa gotebe kurhan kurhan yeramin.^p

²⁹Be, al goyaŋ fole teŋ kuŋ hinhan gore keneŋbe biruŋ biruŋ teŋ, “Be, gebe, ‘Al Kurunyen ya balem goyen pir irde pasi heŋbe epte nanjahal karwore po ireŋ,’ yariŋ go? ³⁰Ninŋeb kuruse hende mat gigen tareŋger katke ginniŋ be,” inen ayaŋ keramin. ³¹⁻³²Al hoyan beleŋ irde hinhan gwahade goyen po pris buda gote karkuwanminya Moseyen saba marya yinŋen ulin wor huwardeb, “Al ga kennaŋ ko. Al hoyanbe faraŋ yurde hiyen. Munan yinŋenbe epte moŋ. Yeŋbe fudinde Israel marte doyaŋ al kurun Mesaia kenem mal po kuruse hende mat kati. Irke keneŋbe fudinde wor po yeŋ nurtek,” inen giwgiw irde ayaŋ kerde epte ma tiyamin. Irkeb Yesu bindere hinaryum al irawa kuruse hende gasa yiramin gore wor gwahade po inaryum.

^p 15:27-28 Asan hoyanđebe gahade hi: ²⁸ Kame mata gwahade fudinde forok yiyyen yeŋbe Al Kurunyen asanđe gahade katin hi: “Yeŋbe mata buluŋ marya kamyin.”

Yesu kamyij

(Mat 27:45-56; Luk 23:44-49; Yon 19:28-30)

³³Be, kuŋ kuŋ naŋa baŋkahal wor po hekeb megeŋ kuruŋ gabe kidoma beler po alu urke kuŋ kuŋbe 3 kilok wawuŋbana hirij. ³⁴Be, 3 kilok wawuŋbana hekeb Yesu beler hokde po Al Kuruŋ goyen, “Eloi, Eloi, Lama Sabaktani!” iniyij. Gote miŋbe “Al Kuruŋne, Al Kuruŋne, daniŋ nubul taha!” ³⁵Irkeb al goyaŋ huwarde hinhan gore nurdeb, “Elaia hoy ira go nurnaŋ,” yamiŋ. ³⁶Goyen nurdeb al kura kup yeŋ kuŋ amil erek irdeb tukuŋ wain fimiŋ mukkuweŋ bana goŋ duk irdeb kutumde taw irdeb tawaŋ, “Nawa,” inerŋbe, “Be, Elaia beler waŋ faraŋ urde teŋ kerke katyerŋ daw niŋge, mekerke kenerŋ hiniŋ,” yiriŋ. ³⁷Be, Yesu gobe uliŋ misiŋ kuruŋ wor po kateŋ, “Woy!” yeŋbe yayaŋa funaŋ, “Ha!” irdeb kamyij. ³⁸Irkeb goyare po Al Kuruŋyen ya balem bana amilbe hende mat kahalte po erek yeŋ kateŋ iraw haryum. ³⁹Be, fuleŋa marte doyaŋ almiŋbe Yesu diliŋ mat heŋ Yesu mere teŋ daha mat kamyij goyen kenerŋbe, “Fudinde, al gabe Al Kuruŋ Urmiŋ!” yiriŋ.

⁴⁰Be, goyarebe bere buda kura gisaw mat huwarde kenerŋ hinhan. Bere gobe Galili mat Yesu gama irde Yerusalem wayamiŋ. Makdala niŋ Mariaya Yosesyia Yems dirŋerŋyat miliŋ Maria, irde Salome manaŋ gor hinhan. ⁴¹Bere karwo gabe Yesu Galili hinhinyabe gama irde faraŋ urde dawet kuraŋ nurde hikeb unerŋ haŋyen bere go goyen.

Yesu mete tiyamiŋ

(Mat 27:57-61; Luk 23:50-56; Yon 19:38-42)

⁴²Be, Yesu kamyij nalu gobe Sabat nalu goke gitik teŋ teŋ nalure kamyij. Nalu gobe Gitik teŋ teŋ Nalu inerŋ haŋyen. Be, Yesu kamyij goyen wawuŋbanamiŋdebe, “Heŋ ga ma Sabat nalu heweŋ tiya go,” yeŋ nurdeb ⁴³Arimatea niŋ Yosep beler Yesu hakwam teke al hoyaŋ beler al gobe Yesu gama irde hiyen al kurabe gogo yeŋ buluŋ nurde untek goke ma nurdeb Pailat hitte kuŋ Yesu hakwam teŋ teŋ niŋ gusuŋaŋ iryij. Yeŋbe tiyuŋ doyaŋ mar gabu irde haŋyen goyen bana niŋ al. Al budam beler nurd unerŋ haŋyen. Yiŋgerŋbe Al kuruŋ beler alya bereyamiŋ doyaŋ yird yird nalu goke doyaŋ heŋ hiyen. ⁴⁴Be, Yosep gore gusuŋaŋ irkeb Pailatbe Yesu kama mere goyen nurdeb dinonŋ kok yiriŋ. Irdeb fuleŋa marmiŋde doyaŋ al niŋ keya heke wakeb, “Yesube bikkerŋ kama?” inerŋ gusuŋaŋ iryij. ⁴⁵Irkeb al goreb, “Fudinde, gwaha tiya,” inke Pailat beler nurdeb Yesu hakwam goyen Yosep tubul teŋ unyij. ⁴⁶Irkeb Yosep gobe kadomya kuŋ amil faykerŋ damu teŋ tawaŋ Yesu hakwam goyen faraŋ teŋbe mala teŋ tukuŋ al hakwam yerd yerd niŋ horabok taltiŋ bana goŋ keramiŋ. Irdeb hora kuruŋ goyen kaŋ kaŋ irdeb tukuŋ horabok mohonŋ pet tiyamiŋ. ⁴⁷Makdala niŋ Mariaya Yosesyia miliŋ Mariayabe Yesu hakwam goyen gor kerhaŋ yeŋ kenaryum.

Yesu kamyinḡde mat huwaryinḡ
(*Mat 28:1-8; Luk 24:1-12; Yon 20:1-10*)

16 ¹Be, Yuda marte usaḡ nalu, Sabat go hubu hekeb Makdala niḡ Mariaya Yems miliḡ Mariayabe Salomeya gobe Yesu kamyinḡ hakwam goyen sam irtek yeḡ he fimiḡ kura hamiḡ igiḡ muḡ goyen damu tiyamiḡ. ²Irdeb fay urke Sande wampot muḡ naḡa pirik irkeyabe horabok bembare kwamiḡ. ³Kuḡ heḡyabe, “Horabok mohonḡ pet titiḡ hora kuruḡ gobe ganuḡ beleḡ kaḡ kaḡ irde siḡa ireḡ tiya?” yeḡ kadom gusuḡaḡ gird tiyamiḡ. ⁴Gega hurkuḡ heḡyabe horabok bamba mohonḡde naḡkenenḡbe hora kuruḡ wor po goyen bikkeḡ teḡ siḡa irtiḡ kenamiḡ. ⁵Gwahade kenenḡbe kuḡ forok yeḡ horabok bana hurkuḡbe al foneḡ kura uliḡhor faykek manaḡ yase beleḡ mat keperde hike kenenḡbe kafura hamiḡ. ⁶Irkeb al goreb, “Kafura heḡ ma. Nasaret niḡ al Yesu kuruse hende mayke kamuḡ goke wayhaḡ gobe gar ma hi. Yeḡbe bikkeḡ huwara. Keraḡ gasuḡdebe hubu ga kennaḡ. ⁷Niḡgeb kuḡbe komatmiḡya Pitaya yeneḡ momoḡ yirnaḡ. Yesube yiḡgeḡ yiyuḡ gwahade po, yeḡ wa meheḡ heḡ Galili kuyeḡ. Gor gab kennayiḡ,” yinyiḡ. ⁸Irkeb bere gobe kafura heḡ barbar yeḡ kukuwamneḡ nurdeb horabok bamba bana mat kateḡ siḡare heḡbe busaharde kwamiḡ. Gega kafura heḡbe mata kenamiḡ goke al kura ma momoḡ yiramiḡ.

Yesu beleḡ komatmiḡ hulyaḡ yirdeb Al Kuruḡ hitte hurkuriḡ

[⁹Be, Yesu wampot muḡ huwaryinḡ goya goyen haḡkapyabe Makdala niḡ Maria diliḡde wa forok yiriḡ. Yeḡbe uḡgura 7 ketal urtiḡ hinhin goyen Yesu beleḡ sope irke igiḡ hiriḡ bere go goyen. ¹⁰Be, bere go Yesu keneḡ mulgaḡ heḡ kuḡbe Yesu gama irde haḡyen marya Yesu kamyinḡ gote doloḡde heḡ eseḡ hinhan marya goyen momoḡ yiryiḡ. ¹¹Gega mel gobe bere gore, “Yesube kamuḡde mat huwara. Irke kenhem,” yinyiḡ go nurdeb fudinde yeḡ ma nuramiḡ.

¹²Be, go kamereb Yesube komatmiḡ irawa kura Yerusalem tubul teḡ tiyuḡ hoyanḡde kuḡ hikeya al hoyanḡ yara heḡ yeḡ hitte forok yiriḡ. ¹³Forok yeke keneḡ bebak teḡbe mulgaḡ heḡ kuḡ kadom yago momoḡ yiraryum. Gega yeḡbe irem gore yaryum goyen manaḡ fudinde yeḡ ma nuramiḡ.

¹⁴Be, go kamereb Yesu yiḡgeḡ komatmiḡ 11 goyen ya bana heḡ dula teḡ hikeya forok yiriḡ. Forok yeḡbe al beleḡ huwaryinḡ kamere keneḡ momoḡ yirke ga tonaḡ tareḡ irde usi tahaḡ yeḡ nurde wasak po tiyamiḡ mar goyen goke yineḡ teḡ saba yiryiḡ. ¹⁵Irdeb, “Kuḡ naḡa kuruḡ al hike kwa goyen bana ne niḡ yitiḡ mere igiḡ gayen tagalde momoḡ yirde tukunayiḡ. ¹⁶Al kura baraḡ gayen fudinde yeḡ dufaymiḡ saḡiḡ irde baptais tenayiḡ mar gobe Al Kuruḡ beleḡ yumulgaḡ tiyyeḡ. Gega al

gwaha ma tinayiŋ mar gobe Al Kurun belej merem yaŋ yiryen. ¹⁷Ne niŋ dufaymiŋ tareŋ irnayiŋ mar gobe Al Kurunyen tarende mata tiŋen gahade teŋ hinayiŋ: deŋner uŋgura yakira teŋ hinayiŋ, naŋa hoyande niŋ mere mat Al Kurun mere irde hinayiŋ, ¹⁸haniŋde kunere duwi yanarke yisinayiŋ gega go ma kamnayiŋ, fe det bulun miŋyaŋ nene kamtek goyen nenayiŋ gega go ma kamnayiŋ. Irdeb al gore garbam mar haniŋ yerde yuneŋ Al Kurun gusuŋaŋ irkeb igiŋ henayiŋ,” yinyiŋ.

¹⁹Be, Doyaŋ Al Kurun Yesu belej mere yiryiŋ go kamereb Naniŋ Al Kurun belej tumulgaŋ tike hurkun al deŋem yaŋ heŋ haniŋ yase belej kipiryiŋ.

²⁰Be, go kamereb Yesuyen komatmiŋ belej kun yeŋ ge yitiŋ mere igiŋ goyen naŋa al hike kwa kurun gayen bana tagalde tukamiŋ. Gwaha teŋ hikeyabe Doyaŋ Al Kurun belej komatmiŋya heŋ meteŋ teŋ mel gore mere teŋ hinhan goyen fudinde yeŋ nurd nurd niŋ teŋbe mata tiŋen turunŋ yaŋ kurayen kurayen goyen manaŋ forok yirde hinhin.]